

東
華
續
錄

臣朱壽朋敬編

臣汪錫增恭校

九月辛亥朔欽奉 慈禧端佑康頤昭豫莊誠壽恭欽獻崇熙皇太后懿旨國家創治保邦綱常名教千古爲昭至於條陳損益隨時變通盡利本無一成之法前因中外積弊過深不得不因時制宜力加整頓而宵小之徒竊變法之說爲煽亂之謀業經嚴拿懲治以遏橫流至一切政治有關國計民生者無論新舊均須次第推行不得因噎廢食迭經明降諭旨剴切宣示大小臣工當能仰體此意惟言事諸臣往往胸無定識卽如亂謀方張之日內外章奏能灼見先機防微杜漸者並不多見迨至事後或且仰窺意旨揣合希榮豈知朝廷用人行政一秉大公執兩用中不偏不倚用特再行申諭嗣後內外臣工務當清白乃心一化新舊之見凡所建白但期有裨時局不得妄意揣摩倘或挾私攻訐是非所在亦自難逃洞鑒也將此通諭知之○諭吏部奏遴選處分一摺大學士榮祿應得降二級調用處分著加恩改爲降二級留任○諭吏部奏遴選處分一摺內閣學士張百熙應行革職處分著加恩改爲革職留任○癸丑調英信爲鎮紅旗滿洲副都統以鍾秀爲正白旗蒙古副都統○以載阜爲鎮紅旗護軍統領散昌爲左翼前

錄統領○欽奉 慈禧端佑康頤昭豫莊誠壽恭欽獻崇熙皇太后懿旨本年山東黃河漫溢被災地方甚廣業經先後撥款截漕飭令該撫妥籌賑濟惟災區既非一處撫賑爲日方長軫念民生無日不履宵旰著發給內帑銀二十萬兩交張汝梅飭屬分別被災輕重核實散放該撫務當嚴飭印委各員激發天良認真辦理務令實惠及民毋任稍有弊混用副深宮軫念民艱有加無已至意○諭軍機大臣等兵部奏山東巡撫張汝梅奏裁副將以下各缺請飭詳加酌覈等語山東濱海控河地方緊要今歲黃河流漫溢饑民紛紛遷徙必須有營汛彈壓方足以備緩急著張汝梅體查情形據實奏明辦理○甲寅以廣東連平州土匪劫獄焚署傷官搶掠革連平州知州王屋等職○賞普濟堂功德林廣仁堂及蘆溝橋粥廠資善堂煖廠米石○鍾亮病請解任允之○諭廖壽豐奏刁民恃眾抗官獲犯訊辦一摺據浙江寧波紹興溫州等府本年春夏之交米價日昂正議令各屬籌辦平糶迭據該鎮道等稟稱永嘉鄞縣各處奸民藉口米貴並因鋪捐土藥捐聚眾鬧鬧鳴鑼罷市毀壞縣府道署及土藥局復因拾米經營兵彈壓有持械拒捕情事刁民聚眾抗官此風斷不可長在場滋事首要各犯既據該撫飭屬拿獲訊明懲辦其辦理不善之各地方官亦難辭咎永嘉縣知縣周炳麟嗜好甚深身任地方毫無布恤勸辦鋪捐委員試用從九品莊受采逼勒催收釀成重案釐局委員試用通判鄭廷驥聲名平常罔恤商艱均著一併革職著鄞

縣知縣劉喬祺疏於防範著交部議處以示懲儆餘著照所議辦理該部知道○諭黃槐森奏廣西土匪滋事請將各屬失陷地方官分別懲處等語據廣西梧州鬱林等屬土匪同時起事容縣知縣王永貞興業縣知縣唐汝霖事前疏於防範致令該縣失陷雖旋經集團先後收復各城究屬防範不力均有應得之咎著一併革職鬱林州知州黃桂丹未能先事預防以致屬邑有失博白縣知縣吳國樑性耽安逸慮事多疏於在籍侍衛泰永年句通匪黨撲城毫無覺察均著交部議處署陸川縣知縣史從煥失城被擄現已回城著革職提省訊辦以示懲儆餘著照所議辦理該部知道○諭軍機大臣等編查保甲為弭盜安民之良法直隸地處近畿尤關緊要茲據榮祿面奏本年直隸總督任內曾經定有章程嚴飭臬司通行各屬現在該地方官等是否均已一律舉辦著裕祿隨時稽查督率辦理以清奸宄而靖閭閻仍將現辦情形先行具奏將此諭令知之○劉坤一奏前准督辦軍務處咨行會議廣練兵團一摺所稱沿江沿海各省舉辦團練一節此事有治人無治法如果辦理得宜則眾志成城自可以輔兵力之不足儻不得其人則苛派騷擾諸弊均恐不免擬請 旨飭下各該督撫體察地方情形妥慎籌辦併詳議章程具奏奉 旨依議欽此 臣維外洋立國盡人為兵中國一時尙難及此惟團練猶是遵行我法管子內政唐之府兵卽其制也此等團練原以綏靖地方現在伏莽潛滋兵力單薄若不練團自相保衛民間恐無

安枕之日矣查向來辦團按戶抽丁往往役及老弱殘廢人數雖衆於事何有裨益反恐苛派騷擾惟有變通辦理專用年富力強之人操習刀矛鎗礮各件略以軍法治之以期用命臣通飭各屬城中設立團練總局以本城公正紳士三三人主之城外東西南北四鄉適中之地各設團練分局以本鄉公正紳士二三人主之就本鄉之鄰閭里甲自爲一團戶口多者爲大團每團練丁二三百人或四五百人戶口少者爲小團每團練丁百人或百數十人務於本團挑選精壯編列隊伍不准招募外人其本團中紳士商賈及家道殷實之孤寡常住寬裕之僧道不能充練丁者則酌派養廉口糧及雙辦軍械軍火軍裝諸所謂貧者出力富者出貲亦是持平之道莫不樂從每團設正團長一人副團長二人以資管帶皆受約束於本鄉分局及城內總局紳士並擇技藝出衆由軍營出身之之武弁以爲教習平日各練丁自行就地操演每月本團合操一次每季本鄉合操一次每年應否四鄉合操或輪流抽調來城看操由各牧令會商總局紳士酌辦地方如有盜警以鳴金爲號本團練丁卽出援助倘遇大股本鄉各團皆來救應後到者罰不到者重罰經臣三令五申民間亦知合此別無自全之策團練尙肯認真其最著者如徐州銅山等屬淮安鹽城等屬揚州高郵等屬團練屢次保衛村莊擊退賊匪有時偶爾失事則團拿追捕往往獲犯並獲全數殲擒拾剗爲之稍息團長練丁亦不免有損傷經該地方官隨時賞卹並由臣酌給功牌匾

頗民情頗形踴躍顧一縣如是各州縣未必皆然一鄉如是各鄉未必皆然所以不能整齊者固由風俗有強弱亦由無以鼓勵之故也夫親上死長之義難以責之愚賤卽其衛身家之心亦不勝其愛名利之心輕外獎而重內獎正可以因勢而利導之伏維 朝廷原懷時務激勵人才凡有專建學堂及學會者予以破格之賞習成一藝製成一器有裨實用者准其專利又定例本官人役因公斃命隨案請卹况團練有關地方安危辦理有成並可以備異日征調至因剿捕盜匪傷亡數與軍營打仗無異可否仰懇 天恩量予鼓勵凡辦團練尤爲出力及出費最多者准給虛銜封典其團長練丁人才出色准給把總外委咨部註冊歸標候補其有剿捕受傷或受傷成廢以及因傷身故或立時斃命者分別給卹以慰其心而作其氣將見聞風感奮莫不爭先恐後敵愾同仇久之人各爲兵將與外洋齊驅並駕未始非圖自強之一策也得 旨著照所請該部知道○乙卯以拉禮爲伊犁副都統○劉坤一奏恭閱電鈔光緒二十四年七月十四日欽奉 上諭各省設立辦公局所名目繁多無非爲位置閒員地步薪水雜支虛糜不可勝計著各督撫將現有各局所中冗員一律裁撤淨盡限一月覆奏等因欽此臣跪誦之下欽悚莫名伏查江蘇爲東南重鎮財賦要區紛轄南洋兼管鹽政事體最爲繁重局所亦因之較多曰營務曰洋務曰鹽務曰地方事宜各有專司本難盡事裁併惟既疊奉 諭旨誡諄諄如履東湖北等省巡撫皆秉

節重臣尚且一併裁撤改歸總督兼管 乾綱獨斷薄海同欽 聖恩最深固不敢瞻徇情面各該局員亦應仰體 聖意勉爲其難以期撙節度支推行新政方不負 朝廷勵精圖治實事求是之至意 庶所轄各局所中通盤籌畫實力圖維除宜昌加抽川釐業歸稅務司代徵儲才學堂現議改爲江南省學堂不計外其事務稍簡者無論所支局費係屬內銷外銷一律大加裁撤酌量歸并庶用款節省一分於時務卽獲一分之益現飭將防營支應報銷歸并金陵支應局洋火藥局并金陵軍械所金陵城內外保甲兩局并爲一局揚州保甲局卽行裁撤責成該府縣經理金陵木釐局歸并釐金總局該局收款專供長江水師兵餉應令總局另款外收照案支放沙漫洲緝私局卽行裁撤責成就近駐防水師巡緝金陵淮南兩書局裁撤員司責成兩淮運司及江甯府分別管理金陵上海兩商務局現已另設總局統轄江皖南北等處商務並辦理商會商學商報各項事宜與湖北聯絡一氣所有原設兩局亦卽裁併以免重複而一事權其餘如籌防支應釐金督銷洋務製造等局及水師陸師各學堂雖係必不可少所有各該局委員亦飭嚴加沙汰應裁者裁應併者併雜支各項竭力剔除應省者省應刪者刪總期破除積習規模一新不使稍有浮糜亦不敢稍避嫌怨各該局裁節薪水雜項銀兩俟裁數後另行具奏目下籌辦農工商各項學堂需款孔亟挹注無從擬懇 天恩俯准儘數提撥濟用俾得迅速集事出自 聖主鴻

施得 旨著照所請該部知道○丙辰欽奉 慈禧端佑康頤昭豫莊誠壽恭欽獻崇熙皇太后懿旨近
年以來山東黃河屢次漫溢瀕河州縣受患甚深小民流離居情形尤堪憫惻因念河工堤埝雖經每
歲修培而潰決漫溢無歲不有閭閻生計所關豈得因循坐視著京外臣工遴訪熟悉河務勸明廢潔之
員臚舉政績出具切實考語保奏候旨簡派事關保衛民生大計爾諸臣當仰體朝廷與民休息之意選
拔真才核實薦舉以圖收效不得采用虛聲致滋貽誤將此通諭知之○劉坤一奏恭閱邸鈔光緒二十
四年五月二十二日奉 上諭前經降旨開辦京師大學堂入堂肄業者由中學小學以次而升必有成
效可觀惟各省中學小學尚未一律開辦總計各直省省會及府廳州縣無不各有書院舊各該督撫督
飭地方官各將所屬書院坐落處所經費數目限兩箇月詳查具奏即將各省府廳州縣現有之大小書
院一律改爲兼習中學西學之學校至於學校等級自應以省會之大書院爲高等學郡城之書院爲中
等學州縣之書院爲小學堂皆頒給京師大學堂章程令其仿照辦理其地方自行捐辦之義學社學等
亦令一律中西兼習以廣造就至各書院需用經費如上海電報局招商局及廣東關姓規費頗有溢款
此外陋規濫費當亦不少著該督撫儘數提作各學堂經費各省紳民如能捐建學堂或廣爲勸募准各
督撫按照籌捐數目的量奏請給獎其有獨力捐鉅款者朕必予以破格之賞所有中學小學應讀之

著仍遵前諭由官設書局編譯中外西書頒發遵行至於民間祠廟其有不在祀典者著由地方官曉諭
民間一律改爲學堂以節糜費而隆教育似此實力振興庶幾風氣徧開人無不學學無不實用副朝廷
愛養成材至意將此通諭知之欽此復於七月初四日奉電傳 諭旨前於五月二十二日降旨諭令各
省開辦學堂限兩箇月覆奏現在限期將屆各省籌辦情形若何著各督撫迅即電奏欽此并准總理衙
門將大學堂章程咨送前來竊維學堂之設爲自強根本要圖我 皇上作育人材孜孜求治屢發 明
詔於京師創立大學堂 特派管學大臣妥議章程克期舉辦 諭令各省一體實力奉行洵足立當代
之楷模新斯民之觀聽臣受 恩深重圖報情殷何敢稍涉因循自貽咎戾惟是道端伊始考覈不厭精
詳經費有常籌畫尤須審慎茲遵照大學堂定章斟酌變通就江甯城先行開辦以期迅速集事謹將籌
擬情形爲 皇上詳陳之查江甯地方爲東南一大都會向來江蘇安徽兩省於茲合闢鄉試此次設立
學堂係爲科舉之梯航俾知學術之階級則兩省士子自應一視同仁擬設江南學堂一區爲高等省學
堂江甯府統轄七屬上元江甯兩縣本係同城擬設中等小學府縣學堂各一區與京師大學堂一氣貫
注層累遞進以符升黜秀之規通計學堂三處員司教習薪水學生飯食書籍紙筆月課獎賞以及各
項雜支每年非八九萬金不足敷用而開辦之初如經營學舍延聘教習購買中外書籍圖冊儀器等項

又非十餘萬金不辦當茲費絀用宏度支告匱如此鉅款實苦難措無從而地方應辦事宜更何敢輕言請款伏思江南固有儲才學堂原議分設交涉農政工藝商務四大綱學額以一百二十名為止又以學生未解西書不得不以語言文字爲塗徑現在所學僅英法德日四國語言文字即使三年有成不過備譯人之選而於律例賦稅輿圖經書種植水利畜牧農務化學汽機礦務工程各國商務中國各貨錢幣貨物諸學均未講求仍須俟諸數年之後定額既少收效又遲且與大學堂章程多不能相應方今朝廷圖治百度維新偏設學堂一洗空疏稍習宏規規矩體用兼資不患無繼譯之才而患無會通之士臣之至愚應迅設省府縣各學堂以植其本另設農工商等學堂以造其精既爲博通學先立始基卽爲專門學操籌進境庶幾人才輩出不致遲緩資時擬將儲才學堂改爲江南學堂推廣學額多延教習具請有學生嚴加考覈分別去留並將舊有之鍾山等經惜陰文正鳳池奎光六書院並改爲府縣各學堂所有各該學堂書院經費悉數撥給濟用至開辦經費儲才學堂連年節省尙有數萬金可以提撥如有不敷容臣另行籌款現已派委道員蒯光典總司其事次第舉行此籌辦江南省府縣各學堂之實在情形也若夫外府州縣雖已有數處設立中西學堂而辦理未能畫一章程難免參差茲幸圭臬有負自應敬謹遵守惟各屬學額多寡須視地方之廣狹經費之優絀以爲衡擬難遽爲懸定業經臣將大學堂章程

刊印分發嚴飭各該地方官查照速辦將本有之書院一併改爲學堂經費不敷均著就地籌款依限於一年之內一律告成其有紳耆好義或捐資獨建學堂或量力分設學塾俱照新章分別奏請獎勵總期漸推漸廣日起有功仰副 聖主殷殷誥誡振興實學之至意得 旨管理大學堂大臣並該衙門知道○丁巳子故總兵劉逢亮照軍營立功後積勞病故諭卹並將事蹟交國史館立傳○諭前因廣西匪徒滋事擾及梧州鬱林各屬迭經諭令譚鍾麟黃槐森蘇元春等派兵剿辦先後將被陷之容縣陸川北流等處次第收復黃槐森並出省親赴鬱林州扼要調度將匪首余大壽謝三妹戴大王四等各股節節蕩平擒渠斬惡撲滅殆盡連日據譚鍾麟蘇元春黃槐森先後電奏檄各屬現已一律肅清團練保甲辦理就緒前調各營分別撤回酌留等情覽奏深慰廑系著譚鍾麟蘇元春黃槐森督飭營縣將漏網首匪李正亭封錫光上緊搜捕務獲懲治以清餘孽所有各屬善後事宜務當慎選牧令認真經理毋稍疎忽其一切詳細情形並著由驛馳奏餘依議○戊午諭張汝梅奏報効銀兩不敢仰邀獎敘等語該撫前曾認借昭信股票銀十萬兩並將本息捐助學堂經費嗣又倡捐銀一萬兩先後諭令戶部核給獎敘茲據再三籲懇不敢邀獎張汝梅歷次報効鉅款實屬好義急公深堪嘉尚伊子兵部郎中張善聞工部郎中張善年均著以知府選用三品廕生張善恆著以主事用以示獎勵該部知道○己未鄧華熙奏遵

旨督率各屬籌辦農桑種植山候補知州彭名保等於安慶省城外寬開官地創日新蠶桑公司兼設農學館以教農家子弟謹將送到章程清單恭繕呈覽下該衙門知之○欽奉 慈禧端佑康頤昭豫莊誠壽恭欽獻崇熙皇太后懿旨昨日軫念山東河患降旨令中外臣工保奏熟悉河務之員候旨簡派茲據張汝梅奏查看山東黃河工程核實覆奏一摺山東黃河連年漫決小民蕩析離居深堪憫惻迭經隨時堵合尙無一勞永逸之策亟應集思廣益詳籌辦法以拯昏墊而重宣防著軍機大臣會同大學士六部都察院各堂官迅速妥議具奏○庚申欽奉 慈禧端佑康頤昭豫莊誠壽恭欽獻崇熙皇太后懿旨詞訟爲吏治最要之端必須隨到隨結毫不拖累方足以恤民命而清訟源近聞內外衙門刑部於應辦案件往往經年累月延不審結甚有創設候審待質各所以及班館名目濫押無辜其閭丁役之需索胥吏之留難種種弊端不可枚舉試思一人坐獄國家不安小民各有生計苟非含冤負屈豈肯輕涉訟庭委身法吏乃有司各官因循疲玩習以爲常全不以民瘼爲念殊堪痛恨著刑部都察院及各省督撫詳定清訟章程嚴核官吏功過所有月報各冊務須實力奉行如有不肖官吏仍前玩泄視爲具文卽著嚴參懲辦毋稍徇縱將此通諭知之○欽奉 慈禧端佑康頤昭豫莊誠壽恭欽獻崇熙皇太后懿旨近來各省奏到就地正法之案以盜犯爲最多此等兇徒其情可惡其愚可憫凡爲盜賊之人每藉口於饑寒

迫切流而爲匪不思犯法干刑斷無生理況若輩皆非懦弱無能倘使伏處務農本有營生之路投營効力亦有進身之階與囚禁圜牆身首異處孰孰失且一經事發累及父母妻子捫心自問其何以安深宮軫念民生無日不以尙德緩刑爲念用是特頒訓諭凡我赤子尙其仰體朝廷痼瘼在抱之懷勉爲良民毋得自逞強梁自罹法網著各省督撫地方有司通行曉示務使遐邇僻壤咸共周知用副愛養黎元至意○奎俊奏承准軍機大臣字寄光緒二十四年四月三十日奉 上諭有人奏江蘇落地布捐病民已甚請予禁革一摺據稱土布落地捐當時並未奏明亦不咨部但於鄉民售布時每疋酌收錢文按月包繳層層過手各有沾潤請比照武進陽湖二縣之例一律著禁等語著奎俊照從前示禁成案體恤貧民斟酌辦理另片奏請收土布比照機布之例但完初次一捐以後概准照票發行等語著一併察度情形妥辦原摺片著鈔給閱看將此諭令知之欽此當即恭錄轉行蘇盤局會同藩司欽遵查明酌議詳辦去後茲據逐層查覆如原奏土布落地一捐既不奏明亦不咨部實令布莊於鄉民售布時每疋加錢四文或六文八文等語查抽釐助餉原指百貨而言開辦迄今垂三十餘年貨目繁多悉賅於百貨之內從無逐項奏咨之案蘇常各屬所產土布先完產地捐收布每疋錢二文連機長布每疋完錢四文出運銷售再完卡捐如前數原摺所稱落地當係產地之誤又原奏按月包繳盤局遞解藩署至今相沿不改藩

司安坐衙齋以爲自然之利且口布莊而委員督局層層過手徵百解十人人各有沾潤等語查產地布捐祇有常熟昭文無錫金匱江陰等五縣歷來辦法常熟昭文二縣則就地收捐無錫金匱江陰三縣則由行莊分別認繳每歲統計收數不滿萬串向解司庫儲備奉部飭辦供布津貼水腳之用檔案班班可考至水卡抽收各捐商人捐錢若干據明聯宗給執而以票之存根按月彙繳總局以備查核捐數之是否相符立法甚嚴循辦已久若捐多填少商人豈肯甘心微百解十聞所未聞則層層過手各有沾潤之說可不辨自明又原奏江蘇布捐惟武進陽湖二縣於同治七年經紳士稟奉示禁請查照成案一律禁革等語查武進陽湖二縣布捐同治七年經前撫卞日昌札飭停免旋於同治九年據紳董稟請書院膏火等無款抵支願於郡城行銷布疋自行酌量抽捐由司局會議詳准從同治十年三月起由府派員會董照章復抽充書院經費光緒二十三年分據該府稟報共收錢二千餘串可見此捐仍未停止尙充地方公用又另片請將土布比照機布之例但宣初次一捐以後概准照案放行等語查出口之布江陰則銷江北常熟昭文則銷閩廣均祇出口一捐如照機布之例改完總捐則不止二文四文之數間有行銷內地與無錫金匱之布經過水卡多者二處少者一處商人習於偷漏不願總捐大抵觀望未肯承認伏查蘇屬產布一捐爲供水腳之津貼如其停免司庫實乏他款以應備請動支正款又與例章不符

部臣亦難照准且武進陽湖二縣布捐照章復抽以充地方公用並未禁革未便軒輊惟查常昭等縣土布從前銷路甚旺自內地機織棉紗盛行而土布之銷數日絀小民生計維艱奴才督飭司局再四籌議擬將前項產地布捐自本年八月起減半徵收解司備用以恤民隱供布水脚不敷津貼另行籌補各卡收捐填票繳查委員既無徵多報少情形應請毋庸置議得 旨如所請行○劉坤一奏臣於光緒二十四年五月初九日承准軍機大臣字寄奉 上諭戶部兵部會奏遵議御史曾宗彥奏請精練陸軍改爲洋操並將各省兵數餉數開單呈覽一摺今日時勢練兵爲第一大政練洋操尤爲練兵第一要著惟須選教習以勤訓練核餉力以籌軍實現在天津新建陸軍江南自強軍均係學習洋操北省勇隊著由新建陸軍酌撥營哨之學成者分往教練南省則由自強軍酌撥營規口號均須一律各直省將軍督撫統限大箇月內將併餉練隊分紮處所妥議覆奏至軍械鎗礮應飭各省機器局酌定快鎗快礮格式鎗子彈分量造法互相討論折衷一是如式製造精益求精以期利用並著一體妥速籌辦毋得宕延餘依議原摺均著鈔給閱看等因欽此又准部咨本年五月二十一日奉 上諭前據順天府府尹胡燏棻奏請精練陸軍並神機營改用新法操演出使大臣伍廷芳奏京營綠營參用西法各摺片先後諭令軍機大臣會同神機營王大臣八旗都統妥議茲據該王大臣等會同議奏改練洋操爲練兵要著各省綜營練

勇登經諭令認真裁併一律挑選舊各該將軍督撫歸入前次戶部兵部議覆御史曾宗彥請改練洋操摺內一併迅速籌議切實具奏等因欽此仰見 聖主整軍經武力圖自強之至意欽佩莫名伏查該御史原奏內稱儘各省已有之餉練各省洋操之兵部臣覆奏內稱既係就已有之餉改練洋操自可毋庸另籌各等語是當就原有餉項酌劑盈虛未能因改習洋操另請加撥此就餉力言之也江南濱海沿江各防營駐紮處所曰吳淞南洋門戶也曰江陰長江門戶也曰鎮江中樞要地也曰金陵根本重區也曰徐州南北通衢也星羅棋布脈絡貫通相地紮營實爲必不可少自上年裁勇節餉一律改營爲旗除新招之江勝營外每旗勇丁二百餘名統計五路防軍不過一萬數千人合計則尙有可觀分紮實無可再減此就兵力言之也欽奉 諭旨飭令一律改練洋操自應就現有餉力兵力查照各該原奏通盤籌畫切實圖維總期餉項不致爲難操防可以兼顧爲第一要義謹分列八條爲 皇太后 皇上詳陳之一各軍統練洋操也查洋操手足靈捷步伐整齊紀律嚴而有法鎗礮熟而有準自強軍已著成效各軍自宜仿行現擬將駐紮吳淞之盛字五旗駐紮江陰之合字五旗駐紮鎮江之江勝六營新湘五旗南字三旗駐紮金陵之親軍七旗護軍三旗衛字三旗共三十七營旗一律改練洋操由自強軍挑選排長前往教練按照各該營旗哨數五哨者五人三哨者三人一切操法統照自強軍章程不得稍有歧異務使規

模日新悉成勁旅此軍與彼軍號令盡一庶幾呼吸靈通其自強軍調出排長各額缺由該統領另行選充募補至徐州地方遼闊盜風素熾原駐防軍皆係畸零分紮或一哨或數棚皆有巡緝外兜保護教堂之責調集合操必滋貽誤應與零星各隊伍及散紮各練軍統俟盛字等營旗練成後再行抽調改練以免疎虞一餉項酌量加增也查北洋新建陸軍正兵月餉每兵四兩五錢江南自強軍則每名八元約合銀五兩六錢均係按月發給足餉各防軍勇丁每名四兩二錢又以近來餉源短絀未能按月發足歷經道銷有案現既改習洋操未免相形見絀嚴其訓練似須贖其口糧前署督臣張之洞奏設自強軍亦稱若照舊日餉章必無肯應募者今縱未能照自強軍之數擬請按年略予加增以示體恤仍不逾照章應支之數此係專指勇丁而言其統領營哨等官薪水銀兩仍照舊章辦理一操衣酌量製備也查洋操者莫不謂戎衣整潔步驟儼肅而衣袴操靴皆係由官製給全軍一律自足以新士氣而壯軍容各防軍餉數較少衣服一切又須勇丁自備參差藍縷其勢使然今既改練洋操此項似不可省惟查自強軍定章每營每年須數千元若三十七營旗查數比照辦理為數過鉅不能不量予變通擬請每名歲給操衣單褲二套單帽一頂包巾一條皮靴一雙統計每年已需銀四萬餘兩尙可設法挹注一薪餉亟宜妥籌也每哨由自強軍酌撥排長一名充當教習擬給月薪十四元核計三十七營旗共需教習一百餘名每年

約需銀一萬四五千兩除將各防軍原有教習薪水抵支外仍須另籌銀一萬餘兩各該勇丁又須酌加餉項以及製備操衣等件統計約共每年增支銀九萬餘兩此項未准另行請撥而各營旗又無騰出之款惟查自強軍遣散洋將改派統領後釐定各項每年約節省銀六萬兩尚可撥用然以盈抵絀仍屬不敷伏思自強軍餉章排長每月十元正兵八元而天津新建陸軍步隊營項目每月五兩五錢正兵四兩五錢湖北護軍營練習洋操親兵每月四兩五錢正兵四兩二錢惟江南自強軍兵丁餉數太優難免各軍有所藉口自應酌量減少以昭公允而資補苴自強練軍原定二千八百六十八人嗣以工程隊未經募練改歸陸師學堂辦理馬隊二營併為一營現係額設五千八百八十八人擬請將排長向支十元者改為六兩正兵向支八元者改為四兩五錢約計每年可節省銀三萬餘兩即以抵補各軍餉項之不足如此一轉移間於餉項毫無出入而各軍洋操可以迅速舉行如蒙 恩准再將自強軍改定薪餉各細章各部立案備核一軍械務宜一律也練兵以備非常非操演純熟鎗礮整齊臨敵斷難制勝江南購存鎗礮以後膛九響毛瑟為最多此項鎗枝尙精利且子彈與大毛瑟相類機器局均能仿造源源接濟操用最為合宜江南各防軍業經一律領用近來湖北湖南浙江先後咨請撥給將來各省自可聯為一氣至各營所用礮位名目磅數難免參差未敢多發快礮子彈購自外洋存儲無幾平時操習用子較多

不能不留備有事之用今既統練洋操擬酌量發給三四磅哈乞開司及阿摩士莊快礮俾資兼習並向洋商訂購德國大生特快礮數尊一俟運到卽行飭局仿造以備分發礮礮便於拆卸庶不致轉運爲難仍一面飭令機器局講求新式新法多造快鎗快礮俾免仰給於人另行奏明辦理其操練口號白晝用旗夜間用燈通飭各軍不准稍有紊亂一國籍亟宜講求也外洋戎事之所以日強者以其兵無不學學無不精也中國之兵由於招募大都不甚識字以云兵法則懵然不知以云輿圖則茫然不曉將弁尙或不免況兵丁乎今既統改洋操雖不敢遽求精邃而行遠自邇不能不植其初基查自強軍新舊四法編一書分兵法軍器測繪數學諸門由淺入深處爲詳備應分發各營旗黃成營哨官以時訓習務期逐漸通曉不得專委諸教習致形隔闕並咨取北洋所刊德國陸師操法入門刷印萬數千本編給各勇丁閱看此外如孫子十三篇坤輿方圖萬國輿圖亞西亞東部輿圖沿海八省口岸全圖一體購印頒發責成各該官長及文案等員不時緝閱指示勇丁以爲精通門徑如各該營哨等官虛應故事或不能勝任卽行分別撤參一弊端嚴行禁革也防營積習漸深流弊百出時艱孔亟不能不改絃更張此次統練洋操係爲實事求是起見各該統領管帶自應加意整頓振刷精神上念朝廷講武之深心下念勇丁習操之勤苦一洗從前陋習方爲不負委任臣隨時派員點驗嚴密訪察如有缺額剋扣等弊一經查實卽

行從嚴參革治以應得之罪斷不稍存姑息具有辦事勤奮傑練認真者亦必奏請獎勵以昭激勵一將領亟應預備也練兵必先選將中外理無二致目下各營旗統領要皆古戰之餘一時之選然不能不預爲儲備俾免將來缺乏之虞查江南陸師學堂本爲教育將材而設擬俟學生畢業後酌發各營一如自強軍差遣之例增其閱歷廣其見聞才具出衆者酌量授以營哨官之任漸推漸廣必有英才出乎其間既爲學堂鼓舞之資卽爲各軍久遠之計庶幾維持不敝精益求精以上八條皆遵照部中原議察酌江南情形就地設籌不另請款事務求核實不致稍涉虛浮合無仰懇 天恩俯賜照准俾得早日舉辦認真訓練以收實效而拓新規得 旨著照所請該督卽認真舉辦以收實效毋得徒託空言○辛酉翁曾桂奏創設吏治學堂按月面試分別獎勵記過並擬另設佐貳官及官員子弟游幕等人學堂得 旨吏治乃地方官分內之事所擬濫升庸議○奎俊奏川省改練洋操由江南自強軍內調取教習並快鎗快礮子彈等下所司知之○諭軍機大臣等本月初九日甘軍在蘆溝橋與鐵路工程司洋人互毆洋人受有石傷甘軍二人亦受重傷此事究竟因何起釁實在情形若何著胡燏棻迅速查明持平辦結○以許應駟爲閩浙總督○欽奉 慈禧端佑康頤昭豫莊誠壽恭欽獻崇熙皇太后懿旨向來中外各衙門辦理強劫盜犯俱屬不分首從自屬照律辦理惟從前猶分別法無可貸情尙可原兩層近則一經審明

真盜無不立予辟首辟以止辟立法不得不嚴惟念盜案首從雖同一犯法究屬稍有區別應如何網開一面稍施法外之仁著軍機大臣會同三法司妥議具奏○壬戌予北洋福靖兵輪遭風被難員弁關慶祥等優卹○癸亥以李紱藻爲內閣學士○貴恆病請解任允之以連順爲烏里雅蘇臺將軍○甲子柏英病請解任允之以嵩崑爲伯都訥副都統○貴州廉副都統銜作爲庫倫駐印辦事大臣○諭軍機大臣等有人奏廣西土匪滋事追原禍始請飭詳查一摺據稱本年廣西軍事實由光緒二十二年匪徒搶署之案而起前湖南巡撫陳寶箴委員查辦此案難免挾私上下誣卸置匪不理釀成鉅患等語著黃槐森按照所奏各節確切查明據實覆奏毋稍徇隱原摺著鈔給閱看將此諭令知之○著黃槐森奏陳寶箴委道員黃炳離來查永安州靈川縣搶署兩案如何覆奏并未咨粵有案具參革有無究抑不悉其詳至承靈兩案起釁一藉米貴造謠一因抗糧糾衆並非土會各匪謀爲不軌查上年潯陽縣及本年梧鬱所屬土會匪滋事實由地方官疏於防範倘非諱匿釀患均與承靈兩起情節各不相侔報聞○內務府親王本格薨派貝子溥倫帶領侍衛十員前往奠醊並賞銀一千兩治喪○丁卯王毓藻奏遵 旨改練洋操擬先就省城三營試辦並裁兵抵支餉項下所司知之○刑部右侍郎文琳卒卹蔭如例○以墊岫爲刑部右侍郎○戊辰文光奏各屬續報水災業經分別勘賑得 旨知道了貴州等處被災甚重該督

務當嚴飭派出各員實力賑撫毋令失所○胡燏棻奏本年九月十一日承准軍機處交片本日軍機大臣面奉諭旨本月初九日甘軍在蘆溝橋與鐵路工程司洋人互毆洋人受有右傷甘軍二人亦受重傷此事究竟因何起釁實在情形若何著胡燏棻迅速查明持平辦結欽此相應傳知欽遵等因承准此查此案甘於初九日戌刻接據蘆保工程司爵士電稱甘軍將伊及副工程司腦裂高用右擊傷請令拿懲辦等情以該處雖係蘆保鐵路段內非甘軍應管之事然既屬順天地面不得不將原電送呈大學士榮祿查閱初十日卯刻准榮祿知會已派副都統奎元仲布游擊王鳳儀偕同甘軍一併前往查辦當即先赴豐台查驗爵士與腦裂高傷痕均在頭面係為石塊擊傷向不甚重迨至到蘆溝橋時接據馬家堡站長來電云兵由京乘火車將次到京甘軍即折回馬家堡妥為照料一面由奎元仲布等赴蘆溝橋查勘一切是晚據西路總同知謝錫芬稟報本月初九日有甘軍兩營來橋駐紮隔內忽於申初間在鐵橋處有滋鬧情事即據蘆保鐵路工程局委員函稱查明起釁情形緣是日四初甘軍兵勇有橫站鐵橋頭上洋員爵士等令其退讓恐火車難避兵勇不服各持亂石擊洋員等面上受傷洋員開放手鎗恐嚇兵勇亦有受傷者遂各回持鎗械前來傷斃工人一名捉去一名並對火車連放數響等情用特稟報再捉去工人已飭巡檢查獲送交支應局等情並據奇兒仲布查明甘軍亦被洋工程司用鎗擊傷兩名正在

商辦問奉 旨飭臣查明辦結當以英國使館甘伯樂隨時在場亦受擊傷聞英國使臣寶納樂已函請總理衙門嚴拿懲辦臣即於十二日先晤英國使臣妥立和平辦法英國使臣以甘軍毫無紀律將來不免與各國為難必須將該兵隊調離有洋人之境並交出此次滋事兵丁從重懲治方能了結臣告以甘軍亦有受傷勇丁必須兩得其平英國使臣請同洋醫查驗臣即帶同洋醫美國人滿樂道馳赴蘆溝橋查明初九日申刻有甘軍勇丁在該處新築鐵橋上戲弄板車洋人哥士瞥見攔阻彼此口角經英繙譯用華語勸說各散旋有甘軍二三十人復至橋旁大呼辱罵哥士往前追拿該勇丁等即用碎石先擊傷哥士次擊副工程司腦裂高並及英繙譯該副工程司即用手鎗開放兩響致傷勇丁兩名迨酉正時工匠散工該勇丁等復沿途攔截鎗斃工匠隋樹魁一名捉去一名復飭據蘆漢鐵路總公司直隸候補道張振榮一併查覆核與謝錫芬所稟相同此甘軍起釁之實在情形也臣復會同奇克伸布等驗明該勇丁二名均係小手鎗擊傷右肩前後一砂子透入一為砂子插過並未入內傷亦均不甚重其為腦裂高手鎗所擊無疑當飭洋醫送至醫院調治其工匠一名奇克伸布等初誤聽為洋人所傷後由宛平縣知縣劉燧稟請派涿州知州龔培隨驗明鎗子圓徑分寸確係軍營所用洋鎗子粒旋於十五日由游擊王鳳儀交到為首滋事勇丁吳金福趙新見二名臣親提訊鞫供詞與所查情形無異當將該勇丁各予棍

實受傷之洋人與勇丁亦均分別調治傷痕逐漸平復案已查辦不允應卽奏明擬結惟該副前營帶
官朱萬榮督率兵丁整隊移紮甫抵營次遽爾出事雖非意料所及但兵丁等初次滋鬧勸散後仍復任
其持鎗出營尋釁以致釀成事端足見約束不嚴殊非尋常疏忽可比相應請 旨將營官總兵銜儘先
副將朱萬榮交部嚴加議處以示懲儆蘆保鐵路彈壓委員聞聞不先勸阻亦屬未能得力並請 勅下
蘆漢總公司查取鐵路彈壓委員職名交部察議至傷斃工匠之勇丁應由蘆漢總公司查明另案辦結
上諭軍機大臣等胡燏棻奏遵查甘軍在蘆溝橋起釁情形現經辦理完結請旨懲儆各摺片營官儘
先副將朱萬榮於所帶勇丁約束不嚴著交部嚴加議處蘆保鐵路委員彈壓未能得力並著查取職名
交部議處餘依議○世鐸等奏光緒二十四年八月二十六日內閣奉 慈禧端佑康頤昭豫莊誠壽恭
欽獻崇熙皇太后懿旨湖北廣東雲南三省巡撫現經裁撤地方一切事宜總督能否兼顧究竟巡撫是
否可裁著軍機大臣會同吏部妥速議奏欽此仰見 皇太后 皇上審定職官折衷至當之意欽佩莫
名臣等伏查總督巡撫統轄文武鎮撫地方俱屬秉節重臣 國初以來屢經裁移歸併至於今日實已
斟酌盈虛無可置議督撫職守各有不同各省情形亦復大同小異大抵總督重在典兵一切海防邊防
水陸各軍以及洋務緊稍鹽務凡與軍政軍餉有關繫者總督主之巡撫重在吏治一切地丁關稅刑名

錢穀以及考察吏治調劑民生凡於地方有關繫者巡撫主之其間經緯萬端亦復互有出入至於湖北廣東雲南三省督撫同城職在會典誠以江海奧區嚴疆重地非督撫兼設不足以鎮懾非常今則各國通商漢口香港兩處逼近粵省城雲南蒙自一關亦屬細心孔道較之當日情形尤爲緊要臣等竊維利不十不變法害不十不改作裁併巡撫一事利害相權實未可一概而論數計遣散撫標兵丁裁去舊廉俸銀等項所省無幾向例歸巡撫專辦之事嗣後均應責成總督一人卽日行公事深恐難於兼顧設遇出省校閱等事省城並無大員坐鎮實無以昭慎重倘因事出缺或別有升調勢必以藩司護理總督亦嫌望輕是裁併三省巡撫望礙頗多不可不熟思審處且今日之督撫卽前代之藩鎮責任固不可不專事權亦不可過重卽如同治年間雲南回匪突於省城起事巡撫徐之霖畏忌無能暗通消息總督潘鐸慷慨赴義誓以身殉人心賴以不去其後督臣劉嶽昭撫臣岑毓英始克收盪定之功是同城之督撫但使有一人得力卽於大局裨益良多若督撫俱得其人其收效當更宏遠又如官文胡林翼於咸豐年間分任湖北督撫其時粵匪騷張省城屢復屢失該督撫同心協力卒得轉危爲安論者謂此二臣如房謀杜斷缺一不可是督撫同城不但兩不相妨並可相助爲理現在時事日艱實未可輕議裁併所有湖北廣東雲南三省巡撫應否復設之處恭候 聖裁又奏光緒二十四年八月二十八日臣等面奉 諭

旨河東河道總督是否可裁著軍機大臣吏部歸入議擬裁缺巡撫案內一併議奏欽此當經交片吏部
欽遵辦理臣等伏查河東河道總督一缺雍正七年由副總河改爲山東河南河道總督分管南北兩河
自黃河北徙山東境內黃河由東撫督辦修守其運河工程並河南境內黃河仍由河道總督管理所有
黃運兩河屬汛大小各員及河標營弁統歸河道總督節制現在河督缺雖議裁而沿河文武俱有修守
之責未便一概裁汰僅裁去河督一缺所省俸銀養廉等項實屬有限且河南巡撫身任地方公事繁重
河督須終歲巡歷河干親籌修濬實非巡撫所能兼顧所有河東河道總督應否復設之處謹附片會奏
請旨又奏據雲貴總督崧蕃奏裁撤雲南巡撫並糧道南關同知各缺奉諭旨著歸入議裁湖北等
省巡撫各缺案內妥議具奏等因除巡撫一缺由臣等另摺會陳外查雲南糧道雖無運務南關同知雖
僅管水利擬請均仍其舊以重職守欽奉慈諭端佑康頤昭豫莊誠壽恭欽獻崇熙皇太后懿旨前因
湖北廣東雲南三省巡撫並河道總督應否復設先後諭令軍機大臣吏部會同妥議具奏茲據詳加機
議會奏請旨辦理各摺片各省總督巡撫國初以來屢經裁移改設本已斟酌盡善現在應行整頓諸大
端不在裁減職官而在綜核名實總督專重兵制巡撫專重吏治誠能各盡其職自可相得益彰使坐
擁封圻辜恩濫職同城則各執意見專任則益形叢脞徒事更張無裨實際其無謂也所有湖北廣東雲

南三省巡撫均著悉仍舊制勿庸裁併湖北巡撫著曾鈺補授廣東巡撫著鹿傳霖補授雲南巡撫著丁振鐸補授至河道總督一缺專司防汛修守事宜亦非河南巡撫所能兼顧並著照舊設立任道鎔著仍回河東河道總督之任該督撫等務當體念時艱實事求是毋負朝廷慎重設官之意又片奏遵設雲南糧道各缺等語督撫既未經裁併其餘各員自應一仍其舊雲南糧儲道並南關同知二缺均著毋庸裁撤嗣後除各局所冗員仍應認真裁汰外其實缺地方各員不必輕議裁撤以重職守該部知道○諭工部奏遵查京師城垣各工情形開單呈覽一摺著派道舒翹英年再行詳細勘估分別工程輕重奏明請旨辦理單三件併發○諭盛宣懷奏請速籌糧儲以固邦本一摺倉儲為民食攸關迭經降旨諭令各督撫嚴飭地方官實力舉辦以備災歉茲據該京卿奏稱近來州縣辦理正供往往視為具文甚至侵吞虧蝕十邑九空一遇偏災請蠲請賑緩不濟急似此任意玩泄罔恤民艱實堪痛恨著各直省督撫督飭各州縣將原有倉穀悉數買補足額其素無倉穀之處亦即設法籌辦按年查驗除陳易新具報存倉實數至設局講求農政業經通諭飭遵並著一體認真勸辦將案奏聞用副朝廷足食備荒至意○世鐸等奏光緒二十四年七月二十七日內閣奉 上諭總理各國事務衙門會同兵部奏遵議武場改制事宜一摺朕詳加披覽所擬章程尚有未能詳備之處著軍機大臣會同總理各國事務衙門兵部再行分別條

欵詳議具奏欵此查原議章程內稱武場改制一事博採衆論酌中定制綜其大要蓋有三端一曰稽名籍二曰嚴考試三曰杜流弊武舉武生童等好勇尚氣過事生風今改試火器人數既衆給束難施擬請非水陸軍營有名籍者不准應試非水陸學堂有名籍者不准應試非練局有名籍者不准應試凡購器演習送考諸事專責成設有疏虞惟該營營官教習團長是問所謂稽名籍者如此嚴位體重轉用甚艱演放既須人助去取必致無憑演礮宜在操場不必以之考試擬請頭場試馬鎗疾馳兩次每次三出共六出中三鎗以上爲合式二場試步鎗六出中三鎗以上爲合式然火器以巧勝不以力勝煙礮擗弱之人難保不濫竿倖進擬仍留技勇爲三場効力戎行宜周知險要并講求測算擬內場試兵法論一道輿地測算等學策問一道策論俱佳者外場雖遜亦可取中其中類任缺無濫所謂嚴考試者如此洋鎗之禍最烈操場練習傷及行路此平時之弊應試時人馬擁擠向背失宜危機立蹈此臨時之弊鎗靶取準之法在手穩眼明手眼熟則命中易平時但演放空鎗定期會操地方文武齊集始准用有彈之鎗擇高岡或平地築土阜安置靶位以爲屏蔽試場屏蔽之土阜宜益高廣遴選熟習鎗法將弁周巡彈壓至於鎗價不貲弊在糜費鎗枝不一弊在紛歧擬馬步概用單響毛瑟鎗飭各營迅速製造以塞漏卮所謂流弊者如此大抵以營伍團練學堂爲科舉即以科舉爲營勇團丁學生之勸等語今欵奉 諭旨令

臣等再行分晰條款詳議具奏。臣等竊維武科改試鎗礮自係因時制宜不得不變通之舉惟鎗礮爲生
軍所未習非教練於平時必不能程能於一旦現在武備學堂未能遍設團練甫經議辦亦尙無書一章
程原擬所稱合營伍學堂團練爲一事不過折衷衆說至於如何分別錄送一時既不能預定臨時必仍
費周章臣等再四思維與其盡改新章尙多窒礙不如參酌舊制卽可通行謹就原議各節詳加酌核分
擬辦法爲我 皇太后 皇上縷晰陳之一章試勿庸改制也各府州縣考童人數衆多火器難於防範
但求齊力強勇之士卽將制亦可以取材鎗礮易於騎射入學後練習未晚擬請學政按臨一仍舊制至
取進武生以後或投營伍或入學堂練局各聽其便一錄送仍照舊例也原議非水陸軍營及學堂練局
有名籍者不准應試凡購器演習送考諸事皆責成該管之營官教習團長立意非不周密惟學堂練局
此時尙未能遍設恐難一律遵辦所有各省鄉試應請暫照舊例錄送以免紛歧一內外場考試規則尙
宜參酌也考試既改鎗礮原議又謂礮位體重轉運維艱不必以之考試定爲頭場馬鎗兩次每次三出
二場試步鎗六出舍礮用鎗於操防之法本屬未備至放鎗較騎射爲易人人能習之似不妨酌留舊制
擬請改爲頭場馳馬兩次先試馬箭三枝再試馬鎗三出以中一箭一鎗以上爲合式二場試步鎗六出
以中二鎗以上爲合式其三場技勇卽照原議至內場論策題各一道應准以一論爲完卷不能作策者

聽一鎗枝宜畫一也馬步既概用單響毛瑟鎗應由各督撫於各廠局從速仿造鎗枝子彈以備考試之用其各省有未經製備以他鎗暫代者應奏明辦理一鎗靶宜酌量定制也馬步皆用毛瑟鎗則設靶遠近寬窄自應就毛瑟鎗定制馬道長一百八十丈均排三座凸形鐵靶各距馬道並五丈靶高五尺寬一尺六寸中靶以響為憑步鎗靶遠六十丈立三環鐵靶靶心圓式對徑二尺外環木架環用朱油灰白油灰相同畫成靶架高五尺五寸寬三尺八寸中靶以環之中心內外分別優劣一鎗枝藥彈宜官為製備也各省鄉試武生人數有朋送可憑所需鎗彈應由各督撫豫先核計製備頒給或卽向各營及練局學堂調取試畢發還至順天鄉試及會試 殿試應就近在北洋各局咨取兵部於考取年分核計人數行文北洋大臣委員解部事畢運回一考試火器宜酌定地方也各省鄉試應由各督撫相度地勢擇空曠處所以為試場順天鄉試會試 殿試應由兵部相度地勢擇空曠處所以為試場俟擇定後卽行奏明一殿試鎗彈宜倍加謹慎也 聖駕親臨理宜嚴肅火器雜沓非所以備不虞且奉 旨錄用之後上者為參游次亦為都守所以求將領之才若重在中鎗仍不過一兵一卒之用自應專重內場一論一策方為完卷至馬步鎗概令用藥不用彈以昭謹慎其鎗靶宜視鄉會試較近兵部酌定具奏一武備學堂宜酌量建設也各省創造學堂現已陸續奏報其各府州縣能否推廣及營造齋舍遴聘教習內堂外堂諸

功課應由各督撫妥定章程奏明辦理一團練宜認真興辦也團練與保甲相輔而行保衛鄉里捍禦賊寇意至良法至美也其流弊或至於逼勒富戶騷擾良民此則地方官辦理之不善不能因噎廢食也應由各督撫就各該省情形因地制宜妥定章程奏明辦理以上各條雖與原議不盡脗合但求利於推行未敢膠執成見如蒙 俞允卽自下科爲始通行遵照辦理其一切冊送場規磨勘各事宜並此外是否尙有應行酌核之處應由兵部體察情形隨時釐定章程奏明請 旨抑 臣等更有請者武科之設原期得折衝禦侮之才自火器盛行已失其利惟科舉之法究屬未便輕廢本年二月間 臣榮祿會奏請將各省武童就地操練充役三年作爲武生挑入武備學堂學習格致輿地等學及礮隊鎗隊馬隊工程隊諸科以次遞升作爲武舉人進士名爲武備特科與常科並行不悖原爲參酌中外兵制造就人才用備干城之選此事未經議行然考試一日之短長實不如學堂營伍訓練操防可以統一月一年以相比較查光緒二十二年十月兵部議覆御史孫賦謙條奏變通武科事宜摺內請令各省營用武進士及投標武舉練習洋礮酌定勸懲章程應仍由各省一律遵照辦理並令該督撫提鎮隨時考驗分別等第先儘其技藝優嫻者過缺拔補以示鼓勵務當明定章程不得虛應故事其選用侍衛亦酌撥入神機營一體練習似於講求武備鼓舞人材之道尤爲周備欽奉 慈禧端佑康頤昭豫莊誠壽恭欽獻崇熙

皇太后懿旨軍機大臣會同總理各國事務王大臣兵部奏武場改制事宜遵行分晰條款詳議具奏一摺武科改用鎗礮原爲因時制宜起見惟科舉之設無非爲士子進身之階至於訓練操防尤以營伍學堂爲儲才之根本所有武場童試及鄉會試均著仍照舊制用馬步箭刀弓石等項分別考試前據兵部奏請各省營用武進士及投標武舉悉令練習鎗礮酌定勸懲章程卽著各督撫一併遵行不准虛應故事其在京侍衛於錄用後著山該衙門咨送神機營一體練習至各省武備學堂應由各督撫酌定建設所有未經入伍之武舉武生等均就近挑入學堂學習格致輿地等學及礮隊鎗隊馬隊工程隊諸科以備折衝禦侮之用朝廷作育羣材武備與文事並重該督撫等務當鼓舞振興實事求是毋負諄諄誥誡至意將此通諭知之○己巳應賑奏疏附縣等屬地震水雹成災業經分別勘賑得旨知道了疏附等縣地方被災情形深堪憫卹卽著飭屬認真賑撫毋任失所○裕祿奏直隸蠶桑局遂漸擴充以廣利源報聞○命許景澄在總理各國事務衙門行走○以丁體常爲甘肅布政使桂春爲甘肅按察使○以趙爾巽爲甘肅新疆布政使端方爲陝西按察使○庚午廖壽豐奏寧波府屬之鎮海奉化象山台州府屬之甯海太平等縣均有鉛礦經臣督飭前署鎮海縣現署鄞縣知縣畢詔策招商籌集股本設立公司勘辦據寶興礦務公司紳商何良棟等及寶華礦務公司紳商佩珍等先後延聘礦師分投勘驗鉛苗甚

旺多係民產該商等各自集資向業主商購次第開採因山質堅厚出貨尙少兼有民間惑於風水礦地驟難購定之處已派委畢詔策會同各該地方官隨時勸導督令各該公司妥籌陸續開辦期收成效下所司知之○辛未賞給同仁粥廠米石○欽奉 慈禧端佑康頤昭豫莊誠壽恭欽獻崇熙皇太后懿旨提督宋慶奏病體未痊請就錦州醫調等語宋慶老成宿望治軍有方著賞給人多十枝俾得調理該提督務當加慎攝養一俟病體稍痊卽馳赴山海關督率全軍認真訓練用副朝廷顧念邊防至意○壬申慈禧端佑康頤昭豫莊誠壽恭欽獻崇熙皇太后 皇上御儀鑒殿日本使臣矢野文雄覲見○以國鈞爲廣東鹽運使○欽奉 慈禧端佑康頤昭豫莊誠壽恭欽獻崇熙皇太后懿旨從來君民一體上下同心凡屬地方應辦事宜雖在官爲之倡尤賴紳民共爲襄理方克於事有成卽如積穀保甲團練等事似屬故常若能實力奉行有利無弊積穀則歉歲足以救荒保甲則常年足以弭盜團練則更番訓練久之民盡知兵自足爲緩急之恃著自直隸奉天山東山西爲始以及各省將軍督撫務當曉諭紳民令將以上各項認真興辦其舊有章程者仍加重訂其未有章程者妥議舉行先從省會辦起推之通省行之各邑速卽照章舉辦以期逐漸擴充總之朝廷以天下爲一家以萬民爲一體休戚相關爾大小臣工切勿畏難苟安虛應故事紳耆百姓亦當知國計皆係民生深宮痼癘爲懷所願爾井里晏然無盜賊水火

之虞其孝父子家人之樂局在蒼生自必能仰體天心不惜財力而圖保衛閭閻之計所有積穀保甲團練各事著各將軍督撫於接奉諭旨後將若何遵辦情形先行奏聞以慰廬系倚視爲老生常談將來以一奏塞責則仍於國計民生漠不相關大負予勸求民瘼之本意矣○欽奉 慈禧端佑康頤昭豫莊誠壽恭欽獻崇熙皇太后懿旨國家籌餉養兵原期禦侮折衝得備緩急之用無如積弊相沿缺額吞餉種種弊端以致習氣日深營制日壞朝廷慨念時艱若武備再不修明積弱情形何時克振各省統帶兵勇大臣手握軍符干城重寄自應激發天良以身報國毋得瞻徇情面自便私圖用特諄諄訓諭嗣後各該大臣務當督率將弁汰弱留強激勵兵丁認真訓練凡屬血氣之倫誰無尊君親上之心但使信實必罰自能作其忠義一旦疆場有事士卒用命咸曉然以國恥爲恥同仇敵愾悉成節制之師庶不負整軍經武至意尙其勉之○欽奉 慈禧端佑康頤昭豫莊誠壽恭欽獻崇熙皇太后懿旨國家建立行省簡用大吏畀以封疆其任事實心克盡厥職者固不乏人而養尊處優遇事敷衍者亦在所不免當此時艱孔棘亟圖自強總不外於地方應辦各事宜認真整頓藉資補救各將軍督撫藩臬爲通省表率卽道府州縣下至巡檢典史官無論大小皆爲民而設利何以興弊何以除均應隨時隨地實力講求至現在國計艱難尤以嚴核度支爲第一要務局所冗員有可裁併者立即裁併徵收釐金首在剔除中飽以期涓滴

歸公如有不肖官吏種種營私務即破除情面嚴行參劾毋稍姑容疆臣身為大僚心膂股肱久寄深宮
期望甚重但能視國事如家事安危利害上下共之無歉於一心自無慚於君父朝廷日理萬幾豈能事
事裁奪若不責成委任誰與佐庶政而臻上理所願自今以後凡我大小臣工各思振作共矢公忠力挽
頹時積習予藉以觀爾諸臣之心地才具切勿任聽劣薄僧吏空言一奏塞責也將此通諭知之○癸酉
魏光燾奏陝西就餉挑隊遊 旨改練洋操並添設工程隊隨營武備學堂下所司知之○劉坤一奏邊
旨籌議湖南設立製造鎗彈兩廠委屬無款司籌請免撥解得 旨如所請行○劉坤一奏本年徐海
等屬復被水災現在採辦米石以備平糶報聞○甲戌欽奉 慈禧端佑康頤昭豫莊誠壽恭欽獻崇熙
皇太后懿旨前因中外各衙門辦理強劫盜犯俱係不分首從雖同一犯法究屬稍有區別應如何網開
一面之處諭令軍機大臣會同三法司妥議具奏茲據世鐸等遵旨會議覆奏強盜得財不分首從原係
辟以止辟之意惟現行則例強劫之案臨時不行及事後分贓者均分別減擬並非概予駢誅州縣官果
能遇案虛心審斷自無冤濫之虞至就地正法章程乃一時權宜並未纂為定例各省地方官憚於解勘
藉圖簡便草菅人命恐所不免嗣後除現有軍務省分及實係土匪馬賊會匪游勇情節較重者仍暫准
就地正法外其餘尋常之案著一律規復舊制辦理朝廷子惠元元總以尚德緩刑為本該督撫等惟當

宣揚德意一切刑獄則於無枉無縱並將保甲緝捕諸事認真講求務使奸宄洗心闔閭樂業以漸臻刑
措之治予實有厚望焉將此通諭知之○諭本年戊戌科會試武舉業經揭曉覆加查核直隸雙好名數
較多除取中八名外誠恐尚有遺才著派散信徐卬於二十五日在南書房將該省挑記雙單好再行詳
細校閱擬取十名請旨辦理○諭董福祥所部甘軍現已全隊調集南苑著派慶親王奕劻前往認真校
閱○乙亥歲給五城各粥廠及崇善堂等處粥廠煖廠米石○依克唐阿廷杰奏奉省遵 旨開辦省城
中學堂擬請添抽鹽釐作為常年經費得 旨如所請行○魏光燾奏陝西開辦中學堂酌擬初辦章程
呈 覽下所司知之○崑那彥圖載漪剛毅在西苑門內騎馬王文韶在西苑門內乘二人肩輿廖壽恆
在西苑門內騎馬並在紫禁城內騎馬○諭昨因本科會試直隸有雙好者多除取中外誠恐尚有遺才
當派散信徐卬在記載雙單好中覆准校閱擬取十名請旨辦理茲據散信等覆校遵擬呈覽朕詳加查
核俱屬堪以取中張廣賜馬聯馥全紫宮孫尙策郭增廊趙雲彪楊克勤劉文海馬朝鳳陳廷敬均著列
入本科榜示准其一體殿試以示朕慎重選才至意該部知道○欽奉 慈禧端佑康頤昭豫莊誠壽恭
欽獻崇熙皇太后懿旨從來君民一體上以誠求下以誠應邇治之隆罔不由此近因時事多艱深宮宵
旰憂勞無日不以教民養民為念迭次所頒諭旨如訓練兵勇勸課水利蠶桑興辦保甲團練積穀各事

宜無非爲海宇策富強爲閭閻謀樂業至於闢邪教則禁奸徒之私立會盟清庶獄則戒愚民之輕罹刑辟所爲訓俗型方者尤屬無微不至各封疆大吏等果能誠心宣布實力奉行何難朝野一心日臻上理乃聞向來各省於奉旨應辦之件並不認真遵辦不過由院發司由司交府發縣一行了事以致恩膏不能下逮明詔皆若具文積習相沿所宜切戒著各省將軍督撫等通飭各府州縣地方官將以上所奉諭旨一律刊刻騰黃頒行曉諭遐邇僻壤務使咸知以後詔旨中凡興利除弊有關於民生休戚者俱著照此辦理學政有教化之責並著督率教官會集紳耆隨時宣講各營弁勇由該管將領勤加訓練傳宣德意勉以忠義經此次申諭之後大小臣工均宜振刷精神以實心行實政毋蹈因循欺飾之習其紳衿士庶亦當激發天良申明大義父兄勉任事勸功平時勿懷畏難苟且之私臨事自獲策志成城之效於以固邦本而振國威不負予諄諄誥誡之至意將此通諭知之○依克唐阿奏前承准軍機大臣字寄光緒二十二年九月二十九日奉 上諭依克唐阿奏奉天金礦試辦期滿未見暢旺現已分別停留一摺覽奏均悉奉省礦務該將軍抵任之初卽奏明金礦耗省利厚擬延礦師購機器以速功效萬不至以籌措之艱置爲罷論茲據奏稱開礦之難或限於地利或限於資本並及開採用人之難此次採金數十處賠銀數千兩並將金州岫巖蓋平海城等處金礦先行停止等語何從前任事之勇後來措手之難如是

卽所有金州等處金礦姑准暫行停止此外鳳凰安東遼陽三處暨通化寬甸懷仁鐵嶺開原海龍城六處產金之區仍舊督飭承辦各員招集股商多籌經費另定妥善辦法務期成效克臻將金銀煤鐵各礦逐漸推廣不得畏難苟安一奏奉旨前旨於不顧日下帑項支絀非請求礦產無以廣興利源該將軍尤當體念時艱力圖報稱於辦礦一事在奉天能開風氣之先方為不負委任將此諭令知之欽此遵旨當信前來跪聆之下惶悚莫名當即分飭各路委員督商認真採辦年餘以來惟承辦通化金礦之阮毓昌稍有起色時交課金其餘各處所報課金為數甚微蓋緣奉省兵燹以後商民元氣未復不能厚集股本購備機器大興工力僅賴二三紳商湊集微資踴躍試採一經賠累卽報停歇用力少而成功難亦固其所本年春間曾據阮毓昌以廟兒溝各處沙金之外又踴得報馬川綫金較有把握稟請核辦奴才聞其尙屬空言未敢率爾陳奏批飭陸續報課金如折數其數至銀萬兩以上者再行稟請酌核辦理在案茲據辦理通化懷仁等處礦務委員候選府經歷阮毓昌稟稱竊光緒二十二年秋間奉委接辦通懷礦務自籌資設立總分各局卡招商僱丁勘採伊始因水阻工旋因寒凍停採二十三年五月間招集紳商在通化縣屬之大廟兒溝帽兒山二道溝及懷仁縣大江沿上下等處設立商廠開採至十一月封凍止所收課金除支局費薪工勇糧外計解金砂照市價折數滿平銀三千餘兩本年二月間仍將廟兒

溝帽兒山大江沿等處原有商廠督同開濶一面集股銀五千兩四糧蓋屋兼製器具於六月初開辦二道溝砂金官廠勘得金苗係南剛山嶺發脈由二道溝自西局東度報馬川折至大廟兒溝約計一百餘里金綫甚長惟形勢與漠河不同漠河皆係官地曠野無人順河而下設卡易防此地則居民散處有主之田需以價購道路四通八達非多派巡兵難免偷越至報馬川之綫金業經探出正綫於六月初一日開辦官廠綫路約寬二尺有奇據老年工頭云山勢雄渾孕育自然深厚將來開至十餘丈必有結室處所任採無窮現已鑿開三四丈及六七丈取砂四萬六千斤先製鐵炕礱盤計用工頭礦丁八十名每日採砂二千斤之譜試以土法鍊之每百斤可得淨金六七分淺處如是深處可知若購機器延礦師加工開鍊其利必更廣遠惟置機造房需款浩繁擬籌股銀四萬五千兩前後合成五萬兩以資開銷溯自承辦以來慘淡經營已逾二稔始苦作輟不常今幸根基已立統計採鍊沙綫兩金開至年底仿照漠河章程除支薪餉局用股利等項所餘淨金以資易銀歸公總可在萬兩以外將來經費充足逐漸擴充將各處商廠一律收歸官辦所得未可限量現將所收課金易銀七千兩呈交計先後共繳課銀一萬餘兩謹擬章程十六條專辦通化懷仁兩縣礦務等情請覈辦前來伏查奉省試開金礦招商採辦不下十餘處大抵本微力薄不能持久兩年以來報虧報停所在皆是卽有採獲之處呈驗金砂成色不一統計各

處自光緒二十二年間開辦起陸續解交銀金不過二百餘兩以之歸還墊款所餘無幾獨懷所開金礦五處共計設立官商八廠解交課金合銀萬餘兩其餘淘汰河金之外探出綫金正苗是其成效已觀若非承辦之員苦志經營勇於任事曷克臻此查該委員阮毓昌識力堅卓習苦耐勞實為礦務中不可多得之員如將現辦各礦專責該員經理無人從而掣肘將來所溶利源必更大有進境惟所請將通懷兩縣礦務劃歸專辦現查該員所設沙綫各金廠在通化界內居多而懷仁僅六大開沿兩廠擬請將通化全境及懷仁大江沿一帶礦務專歸該員承辦俟其力足擴充再將懷仁全境及他屬礦務悉歸經理至所擬章程均尚詳慎周妥因地制宜謹繕清單恭呈 御覽即請 飭下京師礦務總局核定俾可遵守再此次該員漏未將所開各礦繪圖呈閱現已批飭補繪並遵照局咨飭令各屬將已開未開各礦繪圖貼說撰為表譜送省彙齊咨送又海城海龍屬各處金礦現亦由奴才派員督探俟有實效再行奏報合併陳明下所司知之○松椿奏鹽城縣范公隄外有草灘四百餘頃賦役全書迨後逐漸升漲有七百五十六頃乾隆年間准其放荒嗣因無業貧民相率開墾經前漕臣王夢齡吳棠先後委員查辦計成熟地三百零六頃出示招領所收領價列入軍需案內報銷餘地仍留放荒於同治元年八月十九日附片奏明在案迄今閱三十餘年放荒之地多已開墾成熟盜耕盜種日啟爭端現值庫需匱乏自應循

案查辦化私爲公遴委候補同知汪泳沂會同該縣逐加勘丈分別荒熟酌定科則招領收價藉充餉精
至前項草灘上次別除溝渠開庫廟宇義塚領出三百零六頃已攤升銀二百七十兩三錢四分本該
縣賦役全書原案牧馬草場科則之數此次招領之地擬請按照則分另行收租於額賦並無出入下戶
部知之○丙子翁曾桂奏江西省城設立務實學堂下所司知之○欽奉 慈禧端佑康頤昭豫莊誠壽
恭欽獻崇熙皇太后懿旨前因籌餉爲練兵之本迭經諭令各省裁汰營伍騰出餉項以便挑選精壯認
眞訓練是加餉練兵爲今日第一要政從前各省軍營陋習統領營哨各員往往專請應酬營謀差缺趨
踰進退議論風生其實於兵事毫無閱歷於是缺額扣餉種種弊端由此而起尙安營伍日有起色各
直省將軍督撫身膺重寄不但論其操守更當考其才猷不但貴乎不徇私更當求其不偏執目前於練
兵一事尤屬實無旁貸嗣後當各就地方情形寬籌的餉選擇老成宿將威望素著者派充統領營官勿
以新進少年浮夸子弟濫廁其間但使委任得人令其督飭兵弁切實訓練務使一兵得一兵之用庶幾
建威銷萌有備無患各統領營官皆宜激發人良力除應酬營謀等弊奮志功名勉圖上進倘再有缺額
扣餉情事一經發覺定當以軍法從事決不姑寬也將此通諭知之○徵榮祿在西苑門內騎馬○諭本
科傳臚著停止升殿○諭胡燏棻著開順天府尹缺以待郎候補並在總理各國事務衙門行走○諭

前三姓副都統慶祺著發往神機營交奕劻等差遣委用○丁丑莊山譚鍾麟與存霖齡奏廣東同文館又開三年並上年添設俄東兩館總理各員分別請獎下所司議奏○以陳兆文爲順天府府尹○譚鍾麟奏於本年八月初八日承准軍機大臣字寄光緒二十四年七月十六日奉 上諭光祿寺卿常明奏敬器的款以濟時用一摺據稱湖北候補知府鄭思賢應稱廣東同文館寶字館基崇三項行之已久勢難禁止除開姓現規已調歸大學堂抽收經費其寶字館基崇仿照招商承充舊案辦理年可籌報効銀一百萬圓按季解交神機營作爲練兵購械之用據情代奏請旨收並請以鄭思賢招商承充等語著譚鍾麟確切查明欸項是否屬實並鄭思賢可否承充之處據實具奏又侍講學士濟澂奏保康公司商人何元善在總署稟請試辦廣東番攤每年報効銀六十萬圓作爲大小學堂專練火攻等費請飭給咨試辦等語著譚鍾麟一併確查具奏原摺片著鈔給閱看將此諭令知之欽此遵 旨寄信到省伏查廣東省賭風之盛人所共知從前有文武官紳四成報効一欸每年繳銀三十萬圓卽係賭館規費卽服任之初卽與前撫臣馬丕瑤會摺奏明將賭館一律查禁陋規一律革除當時議者紛紛以賭爲粵人生業公家似難得此費臣謂官之於民猶父兄之於子弟爲父兄者決無縱令子弟賭博而恃此爲奉養之需自禁革後雖未必賭風盡戢但開賭之匪棍收規之員弁兵役之四成報効名目已除無所挾持卽

有所畏懼不敢肆意橫行近如南海縣丞張錫藩署西關汛千總李祥輝庇賭事發立行參革亦可稍挽
澆風去年換充閩姓商人革除一切規費故報効銀一百六十萬兩奏案可稽此外僅繳按年常餉別無
絲毫陋規可提作學堂經費者閩姓須考試方開須有錢者方猜番攤則通年晝夜不怠種資者數文數
十文均可入賭財窮命盡害不勝言基累一項據閩商稟准禁緝有案寶字館印番攤之別名鄭思賢以
知府充商開賭復商於士大夫乎此費取之無賴棍徒之手一旦弛禁則賭匪明目張膽肆無忌憚不肖
之官吏復因而牟利營私不可究詰實於吏治民生大有關係若云盜風之熾由於禁賭言尤不經聞因
賭而窩盜賭輸而為盜者有矣不聞開賭可以弭盜也目下時艱餉絀苟可開源節流靡不盡心竭力以
期有濟至於弛賭禁而取陋規乃萬不可行之事鄭思賢等所稱報効百萬六十萬皆欲藉公以營私應
請毋庸置議得 旨所請甚是著卽一體禁止片併發○諭前經諭令各省籌撥福州船廠經費此項銀
兩著戶部通咨各該省將軍督撫撥款解交部庫存儲聽候撥用不得稍有延欠○戊寅鄧華熙奏安徽
省應徵光緒二十四年漕糧尚難徵運本色仍請照案折徵得 旨如所請行○閩浙總督劉寶泉奉贈
太子太保銜卹陰如例○諭京師門禁理宜嚴肅所有紫禁城及內外城派出值班官兵該管大臣及查
城大臣自應逐日巡查乃近聞時有閒雜人等上城該值班官兵等所司何事嗣後該大臣等務當嚴密

稽查禁止閒人任意出入官弁兵丁倘有贖班情事卽著從嚴懲辦以警玩泄○欽奉 慈禧端佑康頤
昭豫莊誠壽恭欽獻崇熙皇太后懿旨奕劻奏遵旨校閱甘軍馬步各營操演完竣據實覆陳一摺董福
祥所部全軍經奕劻認真校閱各營弁勇一律精壯隊伍亦甚整齊一切分合進止均能嫻熟該提督治
軍嚴整教練有力深堪嘉尚著賞給白玉翎管一支白玉搬指一箇白玉柄小刀一把交董福祥祇領以
示優眷並著賞給該軍兵勇銀一萬兩由戶部給發並發去小卷袍褂料二百卷著董福祥分別賞給營
哨各官所有該提督所部甘軍著休息數日卽行移赴駐紮處所認真訓練務期精益求精以副朝廷整
軍經武至意○已卯賞給通州王恕圖等處粥廠煖廠棲流所米石○庚辰諭軍機大臣等奕劻等會奏
遵議京旗徙戶開屯查照成案酌擬辦法開單呈覽一摺近年八旗生齒日繁生計日蹙從前所籌京旗
移屯之法本屬切實可行亟應接續擴充舉辦開墾邊屯各事宜爲京旗安籌久遠之計該王大臣等所
擬辦法各條尙爲詳備惟茲事體浩大經營伊始事理極爲紛繁必須慮始圖終行之無弊方爲一勞永
逸之舉著依克唐阿延茂恩澤永德裕祿色楞額祥麟等按照單開各該處荒地可移京旗屯墾者實有
若干畝並著八旗都統迅將各該旗人丁情願到屯墾種者查明實在人數具奏請旨辦理原摺單均著
鈔給閱看將此諭令知之○欽奉 慈禧端佑康頤昭豫莊誠壽恭欽獻崇熙皇太后懿旨世鐸等會奏

籌辦山東黃河工程請特簡大員前往察看一摺著派李鴻章前往山東會同任道鎔張汝梅周歷河干
履勘情形通籌全局擬定切實辦法必須確有把握實在可行此項河工關係數省民生李鴻章等務當
認真勘辦不得互相推諉徒託空言仍將各項工程分別核實估計應需經費詳細開單奏明請旨辦理
用副朝廷慎重河防至意○賞錢應溥在西苑門內乘坐二人肩輿並免其帶領引見○欽奉 慈禧端
佑康頤昭豫莊誠壽恭欽獻崇熙皇太后懿旨禮部奏取士之法亟宜切實申明舊制一摺我朝取士之
法具載於 欽定科場條例 欽定學政全書 列聖斟酌損益 祖訓煌煌實已盡美盡善該部請切
實申明舊章自係爲維持風會培植人才起見著照所請由該部知照各省學政暨鄉會試正副考官務
當恪遵學政全書科場條例內載條款實力奉行以端士習餘依議另片奏試官闈中查閱書籍請一以
欽頒各種爲斷等語均著照所請行又片奏各省書院請照舊辦理停罷學堂等語書院之設原以講
求實學並非專尚訓詁詞章凡人文輿地兵法算學等經世之務皆儒生分內之事學堂所學亦不外乎
此是書院之與學堂名異實同本不必定須更改現在時勢艱難尤應切實講求不得謂一切有用之學
非書院所當有事也將此通諭知之○是月瑞典挪威國使臣柏固回國以哈勃克代理

光緒一百五十

臣朱壽朋敬編

臣汪錫增恭摺

冬十月辛巳朔時亨 太廟命世鐸奏代有禮○當今鴻章徐桐在西苑門內乘二人肩輿○壬午翁曾桂奏九月初一日准戶部咨七月二十九日奉 上諭軍機大臣等議覆袁昶條陳清理屯田等語屯田之設仿於明代本以養兵實邊至國初屯軍次第裁汰惟有漕運省分仍隸衛所乃專為贖運之計現在漕糧既歸海運衛所半屬虛懸若改衛為屯徵租充餉於國用不無裨益著兩江湖廣浙江各督撫通飭所屬澈底清查各衛所屯田地畝實在數目詳定徵租章程迅速奏明請旨辦理欽此遵即恭錄行查茲據署督糧道春順查明具詳前來臣覆加確核查明江西省向設十二年旗丁因屯田散處各州縣收租不便佃戶屢次不遵改歸各州縣查照上中下科則完稅止賦外徵收餘租額銀十一萬零解儲道庫以為濟運之用自咸豐三年停運後所徵銀兩悉數撥充京協各餉造冊奏銷有案則江西旗丁雖有隨船贖運之名而無收租入己之實且屯田糧租並納較之民佃科則尤重核與他省屯地由旗丁自行執業收租贖運者情形不同正賦餘租業已早充公帑合無仰懇 天恩俯准仍照定章辦理之處出自 聖

裁得 有如所請行○癸未張之洞奏裁撤撫標左右兩營挑選精壯改為勇營練習洋操下部議奏○
張之洞奏本年八月十六日丑刻漢口鎮東嶽廟地方失慎延燒五千一百七十三戶焚斃及溺斃人口
三百餘名已撥款派員撫卹得 旨漢口猝被火災情形甚重實堪憫惻該督當嚴飭印委各員認真撫
卹毋任失所○以徐承煜為刑部左侍郎○諭軍機大臣等本年安徽鳳陽潁州泗州等屬被災鄧華熙
墊撥司庫銀十一萬兩並准開辦賑捐俾作賑撫之需小民諒可不致失所惟念來春青黃不接之時民
力未免拮据著傳諭該撫體查情形如有應行接濟之處卽查明於封印前奏到候旨施行○諭軍機大
臣等本年山東黃河漫溢沿河各州縣被災甚重欽奉 懿旨特頒內帑銀二十萬兩前由戶部奏准酌
撥昭信股票銀二十萬兩該省遵通漕米悉數截留交張汝梅辦理賑撫并准開辦賑捐俾資接濟惟念
青黃不接之時民力未免拮据著傳諭該撫體察情形如有應行接濟之處卽查明撥實復奏務於封印
以前奏到俟朕於新正降旨加恩○欽奉 慈禧端佑康頤昭豫莊誠壽恭欽獻崇熙皇太后懿旨從來
致治之道首在破除成見力戒因循自古有治人無治法蓋立法之初未嘗不審時勢久弊生不得不改
絃更張以為救時之計然或徒務虛名不求實際則立一法卽又生一弊於國事仍無裨益故弊去其太
甚法期於可行者必須慎始圖終實事求是乃能有濟深宮宵旰焦勞勤求治理無時不以力圖自強為

念而內外臣工大率畏難苟安不知振作國家所賴以共濟艱難補救時局者果安在耶卽如泰西各國風俗政令與中國雖有不同而兵農工商諸務類能力致富強確有明效苟能擇善而從次第舉辦自可日起有功第恐淺識之徒妄生揣測或疑朝廷臨常變故不復爲久遠之謀殊與勵精圖治之心大相刺謬總之興利除弊實在疆臣指陳得失實在言路嗣後內外臣工及有言事之責者務當各抒所見凡有益於國計民生者切實陳奏以備採擇施行毋得徒以空言塞責致負殷殷求治之至意將此通諭知之

○命戴鴻慈載瀚載卓查驗挑選八旗及內務府三旗精壯兵丁並精捷營幼丁○諭胡燏棻辦理鐵路事務較繁著毋庸在總理各國事務衙門行走○甲申以李殿林爲內閣學士○廖壽豐病請解任允之○諭御史楊崇伊奏京師各錢店奸商挑剔錢色請飭嚴懲等語著步軍統領衙門順天府五城御史一體嚴拿私燬私鑄等犯務獲懲辦一面出示曉諭各錢店商人於市面通用錢文不准任意挑剔以便商民○乙酉調劉樹堂爲浙江巡撫以裕長爲河南巡撫張紹華爲江甯布政使○丙戌以恩壽爲江西按察使○諭昨日召見之河南布政使額勒精額年力就衰著以原品休致○以明順爲金州副都統○以景星爲河南布政使○礦務鐵路總局等奏本年六月二十四日遵旨開設礦務鐵路總局摺內聲明應辦事宜隨時具奏九月初十日議覆胡燏棻條陳礦路事宜摺內聲明另行核定章程各在案中等



查礦務鐵路誠能辦理得宜可以益國計裕民生然天下事利與弊恆相因況此事至為繁重設辦法稍有參差將使奸商劣紳串通影射壟斷把持而公正妥實之紳商反退縮向隅無以自効且既辦以後利益稍有端倪不肖官吏又或從而覬覦百端魚肉利源未擴弊端叢生斷無可以持久之理今欲興利獨弊自非慎始圖終不可如遴派公司嚴核股本示洋股之限制保華商之利權及用人購地選匠鳩工徵收稅課稽查出入等事亟應明定畫一章程以資遵守而垂久遠等情訪周諮就華洋成式中斟酌採擇謹擬礦務鐵路公共章程二十二條恭候 欽定如蒙 俞允即由 臣局通行飭遵此後因時制宜有應行增減之處再由 臣等體察情形隨時奏明辦理得 旨如所議行○諭知府銜劉學淵員外郎銜慶寬均著自備資序赴外洋內地考察商務○貴懷塔布仍在紫禁城內騎馬徐會澧在紫禁城內騎馬○諭江蘇試用道張謇著督辦直隸全省及熱河礦務並准其設立公司並將籌辦情形隨時稟由辦理鐵路礦務大臣查核具奏○總理各國事務衙門等奏光緒二十四年九月初十日准軍機處鈔交出使美日秘國大臣伍廷芳具奏開辦礦務條陳杜弊章程各摺片本日奉 硃批著王文韶等會同總理衙門議奏片併發欽此○等查原奏內稱中國地大物博各國環伺乘間要求非第利其土疆實亦護其礦產我誠定計於先廣為籌辦既可貽我民之樂利即可杜他族之覬覦從前礦務辦法大約有三曰官辦

曰商辦曰官商合辦但官辦則公款難籌商辦則私財不給官商合辦則商惟恐受制於官亦難取信於民瞻顧徘徊事機坐失是惟華商承辦許附洋股互相維制此法誠良若內地商民或因資本不足或因礦師難延或因機器難購欲求速效且資熟手勢不能不轉任洋商既任洋商則必須審訂章程始可有濟杜弊之要約有數端條陳清地界定年限明抽分占華股公搭核防後患以備採擇等語上等查中國礦產富饒甲於五洲爲外人所覬覦已非一日特以華人資本不裕向用土法開採收效無多近來風氣既開華商亦多糾集公司思效西法開採每以資本不足請借洋款事當開辦伊始利之所在弊卽隨之自非審訂章程誠不足以杜後患該大臣條陳各節洵屬杜漸防微之道此次上等議定章程已將該大臣陳奏各條酌爲採入至原片又稱西人游歷來華探測礦產始徧人皆洞澈我反茫昧應由總理衙門延僱上等礦師並招致曾經出洋肄習礦務學生隨同總局委員周歷各省按址履勘詳細記載列冊備查並行知各疆臣檄下地方官各就本轄境內博訪周諮確查礦產所在呈報總局庶幾披圖披籍一一可稽等語上等查局中擬設礦務學堂延請礦師曾經奏明在案祇以經費難籌一時尙未及舉辦至肄習礦務學生亦經奏明由南北洋大臣遴派聰穎子弟出洋尙未據該大臣咨報從前學生有選派出洋肄業者並無專習礦務之人現尙無從招致惟二十一行省產礦地方所在多有與其由總局派員往勘

勢不能周不若由各該地方官就地查明較爲切實應如該大臣所請由各省將軍督撫轉飭各該地方官於所轄境內察訪產礦處所無論已開未開及開而復閉者詳細查明確勘繪圖貼說於六箇月內咨報總局以憑核辦如蒙 俞允卽由 臣等咨行各直省遵照辦理得 旨如所議行○張汝梅奏 臣承准軍機大臣字寄光緒二十四年九月初三日欽奉 上諭兵部奏山東巡撫張汝梅奏裁副將以下各缺請飭詳加酌覈等語山東濱海控河地方緊要今歲黃流漫溢饑民紛紛遷徙必須有營汛彈壓方足以備緩急著張汝梅體查情形據實奏明辦理等因欽此仰見 朝廷慎重海疆釐飭兵政至意感悚莫名伏查東省營伍自光緒二十二年經升任撫 臣李秉衡奏定裁汰兵額五成分五年裁完共應裁汰兵額六千八百四十名實減原額之半而各營官弁則仍以互相勾撥有一弁而管兵丁十數名及數名者官多兵少徒糜俸餉於營伍地方兩無裨益東省爲南北孔道水陸衝衢舉凡巡洋防河捕盜解犯護餉運糧保衛教堂撫輯災民各事宜無不藉資兵力如照原額裁汰一半不敷分布之處勢不得不添撥勇營而養勇之費則視養兵爲更鉅是擬節省而更費也 臣前摺奏裁副將以下等官缺亦是因兵額過少官同虛設之故今如議將原裁各缺於營汛之相距較近可歸併者歸併之不宜歸併者量予存留則所裁之兵亦應酌留舊額以收分布相維之效查東省裁兵原案於二十二三兩年及本年陸續裁去三成共

已裁有四千一百餘名之多尚有二十五六年議裁之兵尚未裁去可否仰懇 天恩俯念東省濱海
控河地方緊要將奏裁兵額截至二十四年所裁三成爲止所有二十五六年議裁之二成仍照原額
存留勻撥各營分汛操防實於營伍地方兩有裨益得 旨如所請行○丁亥以胡景桂爲山東按察使
○戊子調陳兆文爲奉天府丞兼學政以何乃縉爲順天府尹○己丑恩澤陸保泰都魯河金礦開
辦已得正苗惟原借官款二萬兩並所招商股三萬兩實不敷用擬再於呼蘭賑餘項下提銀一萬兩以
資接濟得 旨如所請行○庚寅 上率王大臣等詣 慈寧宮行禮○壬辰裕祿奏總理衙門前在德
國伏爾鏢廠訂造海容海籌海琛三快船議明由該廠包運來華於六月初九日七月初八八月初六等
日先後到沽經前北洋大臣榮祿先期飭派水師營務處道員潘志俊等會同山德押送委員二等參贊
兵部主事陶式恭隨帶洋文憑單並原定合同前往驗收認真查勘茲據該員等稟報海容一船於八月
初十日試洋每半時行二十海里零四分之一所有船身長寬丈尺彎甲厚薄喫水噸載汽機鍋鑪以及
安設礮位隨帶魚雷電燈等件與合同相符查該三船行海速率經出使大臣呂海寰於出塢時親往試
驗並無減少現查海籌速率與原訂合同尚符海琛速率與原訂合同加增惟海容一船速率稍減因船
行四萬里苔鏽叢生所致海琛速率之能加增即係過滬時曾經進塢油修海容俟刮底上油後速率當

可與合同相符其餘各項機器均無疵病遂將驗收憑單交還各該船主寄回伏願換挂中國龍旗各船
管帶均經前大臣榮祿分別派定每船應配員弁水手火匠役人等均照海船章程配齊稟請核奏等
情前來奴才於本月十三日親往大沽口外登舟覆勘均屬精堅迅利堪與外洋新式快船相埒試放礮
位亦極靈活面飭各該管帶切實操練務臻純熟以期折衝制勝各船備用礮彈亦由該廠包運尚未到
齊應俟運竣點收清楚再行咨報總理衙門查核下所司知之○壽蔭奏熱河地方遼闊周環數千里所
在皆有礦苗惟沙纖微細矚現靡常又兼辦理未能盡善以致不能垂久而原定課額又復過重所以難
期推廣是以奴才前經奏定金礦二十四股章程內開以十股升課以十股歸股東餘利以四股作爲辦
事司員花紅獎賞核與向章稍爲輕減茲詳核各礦冊報銷款繁重若照二十四股升課仍難望有起色
緣口外地方山高谷險石性堅硬鑿均不易施往往所得不抵所費若再令升課過重勢必裹足不前
殊非開利源而裕課款之道奴才傳訪周咨互相比較非再稍爲變通難期興旺擬請嗣後無論金銀各
礦均以出數多寡計算升課金礦每得金一兩徵課金六分銀礦每得銀一兩徵課銀八分並不另耗
羨礦務一切開銷均由礦商自行辦理自升課日起由總局派員前往督辦稽察以免偷漏如此變通庶
可以廣招徠而裕餉源得 旨著將辦礦務大臣查核辦理○甲午王毓藻奏黔省遵 旨裁併鹽課

後報銷等局所所節之款留備用報開○乙未劉坤一奏准戶部咨開江蘇酌減外海內洋裏河太湖各水師共裁兵三百四十四名每年節省餉米銀一萬四千四百餘兩所有遣散兵丁各按本餉數目支給三箇月恩餉查核准銷成案係屬兩月此浮支一箇月恩餉應令刪除追繳等因查前裁長江水師兵勇奏明發給三箇月恩餉當奉 硃批允准此次裁減江蘇水師發給三箇月恩餉係照長江水師之案辦理且所裁管帶以外海內洋爲大宗巨海風濤視長江爲尤甚各該兵丁不避危險勞苦有年當茲節餉撤遣之時尤應酌加體恤似未便稍涉偏枯現在兵丁早經遣散恩餉均已照數發給妥屬無從追繳合無仰懇 天恩飭部查照長江水師成案按數准銷出自 鴻施得 旨如所請行○依克唐阿奏前因奉省制錢短絀懇帖易於偽造奏請購機設局鑄造大小銀圓以期便利奉 旨允准嗣在天津德國禮和洋行購定製造銀圓各種機器鍋爐所需價銀別無款項可籌請將此項購價並將來安設機爐修蓋房屋諸費暫由奉天各項稅捐項下每兩酌提五分核實動用於光緒二十二年八月初九日具奏奉 旨依議欽此行知在案本年六月初九日開工試鑄旋據造成大銀圓並兩開銀圓共二等呈送前來奴才細加考驗分兩重輕係照部定章程較准成色亦好一俟機器大開商民信用卽令通省鋪商市平交局鼓鑄以兩付兩俾可廣行鑄造局中不得以庫寶庫平爲詞致有增減亦不准商人附搭股本致

遵定章並飭令將地租稅釐凡向來無論以銀易錢交納者均准以銀元兼收以期取信商民目下每月可鑄銀二萬五千餘兩每鑄元一萬兩以二等句指率算除去搭配料件傾鎔火耗以及員司工匠薪工核實開銷外約得贏餘銀三百四十餘兩容俟試辦一年後再將鑄造章程並購機造機購物件及一切薪工開支暨設廠蓋房工程分晰開單造冊奏明辦理丁戶部知之○內申修 永福寺竣○賞鹿傳霖在紫禁城內騎馬許應騏仍在紫禁城內騎馬並在西苑門內騎馬○賞聞散宗室覺難人等一月錢糧加散宗室覺羅孤寡半月錢糧○賞京師八旗綠步各營官兵半月錢糧○裕祿奏准軍機大臣字寄光緒二十四年九月初四日奉 上諭編查保甲為弭盜安民之良法直隸地處近畿尤關緊要茲據榮祿面奏本年在直隸總督任內曾經定有章程嚴飭臬司通行各屬現在該地方官等是否均已一律舉辦著裕祿隨時稽查督率辦理以清奸宄而靖閭閻仍將現辦情形先行具奏將此諭令知之欽此遵查本年六月十二日奉 上諭各省辦理保甲務當嚴飭地方官實力舉行以期民情固結奸宄無從匿跡仍將整頓辦法先行切實具奏等因欽此經前督臣榮祿札司申明保甲責成各州縣一體振刷精神力挽因循積習聯莊之法亦可相輔而行以輔兵力之不足並督同臬司酌擬損益舊章整刷積弊明定賞罰嚴司稽查辦法四條奏奉 硃批知道了即著嚴飭各屬切實辦理毋得徒託空言仍屬有名無實欽

此欽遵行司通飭各屬切實舉辦勒限一月將辦理情形具覆在案欽奉前因復經札司通飭遵辦去後茲據臬司周遵詳稱飭據各屬州縣陸續稟報均已一律舉辦大率本屬日保甲定章參以現在辦法察度該地情形從新整頓或分鄉擇派紳士或按村設立首事清查戶口挨戶懸牌並勸聯莊或以三五村爲一聯或以十餘村爲一聯守望相助具有政務殷繁州縣稟請委員幫辦均經批切實心辦理務期匪徒竄跡民戶相安以靖盜風而弭隱患等情詳請覆奏前來奴才查肅清內匪固以民心實爲當務之急保甲之法果能認真舉行日久不懈則盜源自清民志日固惟當督飭各屬按照現定章程切實舉辦總期官民聯爲一氣無相隔閼該州縣有能辦理著效者即請從優獎拔其有疲玩不知振作者亦卽嚴行參辦隨時隨事實力考察勸懲兼施以收實效以仰副 朝廷軫念民生綏靖閭閻之至意至漁聞保甲已行司分飭沿海各州縣妥速籌辦俟擬定章程另行奏陳得 旨知道了著限兩箇月將辦理成效如何據實具奏毋得徒託空言○丁酉諭軍機大臣等現在時局艱難練兵爲當務之急熱河察哈爾均屬邊疆要地所設額兵著該都統認真訓練並督同協佐等員將一應軍實整頓齊備各該旗餘丁精壯可用者諒必不少著逐名挑揀隨同訓練仍將辦理情形隨時具奏將此由四百里諭令知之○魏光燾奏韓城等縣被水被雹成災得 旨知道了被災處所均著認真查勘撫卹毋任失所○以徐致祥爲兵部

右侍郎○己亥鄧華熙奏安省邊 旨設立武備學堂開辦及常年經費由支應局防餉裁節項下撥充
下該衙門知之○以果勒敏爲馬蘭鎮總兵兼總管內務府大臣○戶部奏查光緒二十年七月間 戶部
因籌餉緊要奏請將二十一年分在京王公以下滿漢文武大小官員俸銀並外省文武大小官員養廉
均按實支之數覈扣三成統歸軍需助用嗣又奏請將二十二三四等年京俸外廉按年分別扣存候撥
先後奉 旨允准通行遵辦在案現在添練新軍購買船械用款極爲浩繁加以押還各國洋債磅價不
敷作抵七處釐金更須撥補且各省認借股票來年應還利息統須部籌非豫爲籌畫屆時何以應付查
俸廉兩項併計每年覈扣數逾百萬以三成分計各員所扣無多以百萬合計公家所裨實鉅當此時局
艱難度支匱乏申外文武久沐 皇仁允宜共體忠義之忱藉伸報効惟查京外弁弁其職分較卑若上
年各省覈扣養廉文職州縣以下武職參遊以下疊經各該省奏請免扣均邀 聖明允准中外事同一
律臣等公同商酌擬請照案將光緒二十五年分京官應得俸銀文職自五品以下武職自四品以下仍
照全數開支其文職四品以上武職三品以上照案再行覈扣三成外官應得養廉文職自府經歷職丞
以下武職自都司守備以下仍照全數開支其文職州縣以上武職參遊以上照案再行覈扣三成俸京
俸外廉均擬再行接扣一年專款存儲聽候部檢核不准率行動用一俟 命下即由 戶部通行在京各

衙門暨各省將軍將撫欽遵辦理欽奉 慈禧端佑康頤昭豫莊誠壽恭欽獻崇熙皇太后懿旨戶部奏
請將京外文武各員原俸照案再行接扣一年等語文武官員所得廉俸藉以養贍身家若將核扣三成
之案視為成例逐年接扣實不足以示體恤該部所請將京官文職四品以上武職三品以上俸銀外官
文職州縣以上武職參遊以上發廉再行接扣一年之處著毋庸議○庚子調崇光為正白旗滿洲副都
統載瀛為鑲藍旗滿洲副都統以那蘇圖為鑲黃旗蒙古副都統○調恩普為正黃旗護軍統領以定昌
為鑲藍旗護軍統領○辛丑諭開缺巡撫吳大澂居心狡詐言大而誇遇事粉飾名惡劣著即革職永
不敘用○諭翁同龢授讀以來輔導無方從未以經史大義訓切敷陳但以怡情適性之書畫古玩等物
不時陳說往往巧借事端刺探朕意自甲午年甲口之役主戰主和甚至諛及遷避信口侈陳任意惡意
辦理諸務種種乖謬以致不可收拾今春力陳變法密保康有為謂其才勝伊百倍意在舉國以聽朕以
時局艱難亟圖自強於變法一事不憚屈己以從乃康有為乘變法之際陰行其悖逆之謀是翁同龢濫
保匪人已屬罪無可逭其餘陳奏重大事件朕間有駁詰翁同龢輒拂然不悅恫喝要挾無所不至詞色
甚為狂悖其跋扈情形事後追維深堪痛恨前令其開缺回籍實不足以懲辜翁同龢著即行革職永不
敘用交地方官嚴加管束不准滋生事端以為大臣居心險詐者戒○甲辰調張紹華為江西布政使以

長祿爲江寧布政使延祉爲河南按察使○諭劉坤一奏副貢潛謀不軌獲案訊供請旨辦理一摺江西廣豐縣副貢生楊恭宸平素慣弄刀筆武斷橫行竟敢投書教堂潛謀不軌幸該堂教士深明大義立將原函呈出經劉坤一等於本年四月間飭拿到案訊明悖逆情節該貢生身列士林甘心悖逆實屬喪心病狂罪大惡極楊恭宸著卽行正法以昭炯戒而靖人心各國來華傳教意在勸人爲善此次該處教士劉鐸於楊恭宸密致信函首先舉發尤屬實心爲善忠正可嘉劉在鐸著賞給三品頂戴並給予二品封典以示獎勵餘著照所議辦理○諭俞廉三奏稟拿糾衆奪犯燬署盜匪請將疎防文武各員分別懲處一摺湖南安鄉縣盜匪潘永懷等糾衆劫奪夥犯王夢生殺斃團丁兵役多名並縱火焚燒民房延及縣署經署安鄉縣知縣胡鑑澄會同營汛將潘永懷等拿獲分別懲辦尙非緝捕不力惟銜著被燬疎脫獄囚該有獄管獄各官均難辭咎著安鄉縣知縣胡鑑澄安鄉縣典史周恂屏均著先行交部議處補用副將胡榮輝於胡鑑澄知會防範之初並不悉力堵禦事後又復鋪張功績希圖掩飾屬庸怯無能難期振作著先行革職以肅戎行仍著俞廉三督飭各營縣勒緝逃犯逸犯務獲究辦毋任漏網餘著照所議辦理該部知道○榮祿奏自強之計首在練兵北洋屏敝京師尤關緊要奴才奉 命督師若不統籌全局豫爲區畫臨時何所措手查北洋除淮練各軍而外有毅甘武毅新建四軍分之各有自主之權台

之實無相維之勢一遇戰陣仍形孤立欲求制勝之方必使各軍聯爲一氣然後可期指揮如意今擬肅
士成一軍駐紮蘆臺距大沽北塘較近扼守北洋門戶爲前軍董福祥一軍駐紮薊州兼顧通州一帶爲
後軍宋慶一軍駐紮山海關內外專防東路爲左軍袁世凱一軍駐紮小站以扼津郡西南要道爲右軍
奴才另募親兵萬人爲中軍擬於 南苑內擇地安營督率訓練如此總爲五軍聲勢自然聯絡平日分
防各要隘一經徵調則大軍雲集無察越漠視之分自可收指臂相聯之效其原有之淮練營中營者舊
制大約以淮軍防海口兼守礮臺以練軍分隸各鎮專守地方現在實存淮軍計二十四營有零其官弁
勇夫一萬二千餘人練軍計四十二營有零其官弁勇夫一萬九千餘人惟相沿日久屢經抽調裁撤其
餉章營制不無參差且有分防海口內地之責非極衡至當未易更張至應如何歸併如何裁汰奴才奉
職都門未便遙制應由督臣裕祿就近體察情形酌核商辦一俟各營歸併布置妥協再由奴才督飭各
將領認真訓練以便隨時調遣至於直隸通省綠營額兵除挑作練軍暨本年裁減一成外實存額兵二
萬八千五百餘名能否再裁亦應由督臣裕祿通盤籌畫以期周妥抑奴才更有請者練兵以籌餉爲第
一要義餉項不足則軍心不固詳潰堪虞新募中軍萬人每年約計需餉一百二十餘萬兩查有部撥添
練新建陸軍餉銀四十萬兩擬令該軍暫緩添練卽以此項餉銀移作奴才新募中軍之用計不敷銀兩

前於 召對仰蒙 天恩准於部庫存儲各省撥解閩省船廠經費項下動撥其穀甘武穀新建四軍有豫餉甘餉准餉及部撥各省關之餉近來每解不及額以致時形匱乏仰懇 飭下戶部將北洋各軍餉項務籌的款嚴催各省迅即協解不得藉端延宕並請批咨報 奴才行營以便考核查原任大學士左宗棠在陝甘總督任內以解西征協餉奏明嚴定功過茲以 畿輔重地較之西餉所關尤要此後各省倘不如額協濟 奴才即查照左宗棠舊案將解餉不力之藩司關道指名嚴參如能補數解濟每屆三年亦照西餉之例分別奏請獎敘庶協餉可期踴躍不至有缺乏之虞至各軍餉章必使劃一萬眾乃能齊心四軍之餉以新建爲優若將淮練綠營裁併騰出的餉集有鉅數即以酌加各軍正勇之餉使與新建一軍相同免致士卒藉口惟新建營制官弁勇夫名數較多開支亦鉅各軍概不得仿照增加以示限制 奴才世受 國恩夙承先志際此時艱夜思早作尙有不遑之勢但期於軍務稍有裨益敢不實力請求以仰副 宵旰勤勞之意欽奉 慈福端佑康頤昭豫莊誠壽恭欽獻崇熙皇太后 謹 奏 欽差大臣大學士榮祿奏練兵籌餉大概情形一摺所請將提督朱慶等所部分爲左右前後四軍扼要駐紮布置尙屬周妥並自請另募中軍萬人擇地安營督率訓練均著准行所有新軍餉項除將添練新建陸軍餉銀四十萬兩撥充外不敷之數准由各省撥解福建船廠經費項下移用至朱慶等各軍拱衛近畿所關甚重

必使餉需無缺方足以資餉騰著戶部仍按前定指撥的款嚴催各省關迅即如額協解倘有任意延宕拖欠卽由該大臣指名嚴參北洋訓練各軍合計尙有三萬餘人若任其窳惰以有用之餉養無用之兵殊爲可惜卽著裕祿體察情形認真裁併仍歸榮祿飭令操練隨時調遣現當時事艱難以練兵爲第一要務該大臣責無旁貸務當實力講求俾各軍悉成勁旅以副朝廷整軍經武之至意餘依議○榮祿奏行軍之道器械爲先各軍餉數多購自外洋設遇決裂開釁各國守局外之例必至束手受困現時南北洋暨湖北各省多設有機器製造等局擬請飭下各督撫就地運籌鉅款移緩就急督飭局員趕造新式後膛快礮小口徑毛瑟鎗務期一律以濟各軍之用軍火庫藏不宜設於沿海地面當於腹地建置子藥局庫以儲存儲庶不至有意外之虞至於地圖形勢尤兵家所必究各營將領於海口旣不能處處親歷圖說斯爲至要擬飭北洋武備學堂選派精於測繪學生將所有北洋與圖分投重加考較凡海口淺深礮臺布置以及山川道里遠近均繪圖說確悉不遺然後分頒各將領隨時熟看詳細考察於行軍有所把握庶免進退失據矣欽奉 慈禧端佑康頤昭豫莊誠壽恭欽獻崇熙皇太后懿旨榮祿另片奏請飭南北洋及湖北各省趕造礮礮並請精考北洋沿海與圖各節行軍利器以後後膛快礮小口徑毛瑟鎗爲最現時南北洋及湖北各省均設有機器製造等局著該督撫就地籌款移緩就急督飭局員認真

考求迅即製造至地圖爲用兵所必究著北洋大臣督飭武備學堂將沿海與國考較精確繪具總分各圖通頒各營以資練習○欽奉 慈禧端佑康頤昭豫莊誠壽恭欽獻崇熙皇太后懿旨榮祿另片奏請調員隨營差委等語西安城守協副將田玉廣直隸督標中軍副將張士翰留陝補用副將王明福寧夏協領奇克伸布開復副都統恩祥均著交榮祿差遣委用該部知道○乙巳 上御勤政殿俄國使臣格爾思親見○諭奕劻等奏建造天津至鎮江鐵路請派員督辦一摺著派胡燏棻督率辦理惟該侍郎現經承辦津蘆及山海關外一帶鐵路事務紛煩非一人所能兼顧江蘇補用道張翼著以四品京堂候補幫同胡燏棻辦理一切鐵路事宜○文光奏查前奉 上諭據榮祿奏請飭四川等省籌款設立製造局廠漸次擴充當經前兼署督臣岑壽朋就川省原有機器局擴充製造不必另設局廠即以該局歷年節省餘存銀一萬二千兩添造機器一俟機器造成再行籌加工本推廣製造等因奏奉 硃批該衙門知道欽此○遵當經轉行在案茲據辦理機器局務督按察使記名道安成成綿龍茂道長春以局中從前購辦機器無多若欲廣製鎗礮機器實不敷用現在添製長刨牀一部小車牀及壓銅機器引長機器齊口機器各四部緊口機器二部均已一律製全機巧靈動結實均與購自外洋者無異即於節省項下儘數開支惟機器既已增添則製造亦宜推廣擬請於開局年支經費八萬兩之外加增經費銀二萬兩以

爲製造之用仍於成綳道庫土貨釐金項下開支詳請具奏前來臣查川省機器局雖經設立多年惟以機器無多不能推廣製造現當整飭武備鎗礮在所必需今據該局將節省經費添造機器多部以公中節省之資添局中未有之器具所造各具均尙精良合用較之購自外洋速運費併計所省實多惟機器既添製造卽應推廣准於土釐項下每年加支銀二萬兩仍俟奉旨之日再行開支以濟要需而重公項至現造機器動用銀兩原係節省所餘無關正款應請免其報銷其應需外洋鋼鐵及一切物料等件現擬委員赴上海購辦合併聲明得旨著卽認真推廣製造仍將添製何項鎗礮數目若干按年奏報該部知道○丙午 慈禧端佑康頤昭豫莊誠壽恭欽獻崇熙皇太后 皇上御製鑾殿比國使臣寶瑪親見○加寬東城小市口煖廠米石○展兵丁等借支庫銀應扣庫利兩月○胡聘之奏於本年二月遵議裁兵節餉擬請續裁綠兵四成暨裁汰官弁歸併營汛各情形業經奉 聖鑒並聲明一切詳細辦法俟奉旨允准後再行飭議具奏在案嗣迭奉諭旨以今日時勢練兵爲第一要政飭令歸併防餉改練洋操等因近復欽奉 諭旨以加餉練兵爲今日第一要政令各就地方情形寬籌的餉切實訓練等因仰見 朝廷修明武備慎重地方之至意自應欽遵妥籌辦理查各省幅員寬狹形勢險要實爲京畿右輔每歲所入地丁鹽課等款約四百餘萬兩而部撥京協各餉多至三百餘萬尤爲國家財賦要

區湖查同治年間辦理防務時督省制兵尙有二萬餘名而所調湘淮各軍仍不下數十營誠以地方至重非厚兵力無以固疆圉也迨後防軍陸續裁撤漸盡綠兵除挑練外又以疲弱屢次議裁現計汰存之數僅止二千五百餘名練軍雖有五千而駐省者僅一千餘名分隸南北兩鎮者亦均不滿二千人平時既分劄各處每屆冬防又須多設防卡分布恆苦不敷現在督省地方盜風甚熾南路則客匪游民糾聚強搶北路則馬賊散勇乘機肆掠彈壓巡防皆關緊要而兵力如此單薄其將何以衛民生況後皖豫之交時有匪徒蠢動山東曹濟江北淮徐一帶災民甚眾處處伏莽素多尤慮勾結爲患萬一鄰疆不靖而督省邊備如此空虛其又何以禦外侮且自湘鄂失險津榆各口防不勝防京師根本重地誠宜嚴密布置卽近畿各省亦宜屯宿重兵以備征調乃直東秦豫皆有防軍每歲所支之餉自五六十萬至百餘萬不等督省同列畿輔獨無一防營設有緩急並無勁旅可資調遣勢必貽誤事機此尤微臣所目夕滋懼者也茲與司道等再四籌商欲免裁綠營而兵勇已久留仍難恃欲改練洋操而餉需過鉅力有難籌計惟有就督省裁節之餉添練新軍數營選派得力將領認真訓練合中西操法而兼取其長步伐務令整齊鎗礮必求精利並令駐劄省城左近山上隨時調閱以期悉成勁旅查督省裁兵案內上年節省銀五萬兩本年節省銀九萬餘兩並減發驛站銀五萬兩原請專備撥練新軍之用茲督省既須添練新軍

又無防餉可併自應以本省節省之款供本省添練之需且與就餉練兵之議相合應請自二十五年起將兩次節餉及減發驛站銀兩一併作爲督省添練新軍之用以免另行請款如蒙 俞允卽飭將此次議裁練兵酌留精壯俾免流而爲匪並派員赴外省招募一俟成軍後卽飭趕緊訓練其一切營制餉章容再詳議分別奏請辦理 旨如所請行○丁未張謇奏近年銀價日賤錢價日貴每銀一兩易制錢一千二百文南北各省到處皆然實於 國計民生大有關係議者謂錢價之貴由於錢少必以禁私鑄鑄新錢爲補救第一要義然各省有如所議實力奉行而錢價仍不少貶者推原其故雖曰錢少亦由銀多在自中西互市以來適美澳各洲銀礦大開以所鑄銀條運至中國兌換查今進口之數歲凡三千萬而近年各省議築鐵路加開礦產及創設製造等廠籌借成本亦均以金磅折合現銀來源既多市價必賤若求補救非鼓鑄銀錢不可蓋鑄銀錢乃所以濟制錢之不足也中國鑄造銀錢始於廣東而直隸湖北江蘇安徽浙閩等省繼之皆係沿江沿海通商省分流通尙易至於西北內地諸省亦間有建造銀錢之議者而往往不甚流通卽以東南各省言之其流通亦遠不如鷹洋爲數之鉅鷹洋者卽墨西哥所鑄之銀錢也合中樞七錢二分名爲九成銀質一成銅質實則銀質居八成二三條悉以紅銅參雜商民習用已久亦甚便易不但毫無貶抑且漲加三分而中國自鑄銀錢則貶抑之其中窒礙情形甚多



洋商知其然也歲捆載所銷鷹洋易我生銀運回本國重加鼓鑄或仍捆載來華往復週環利權為所佔且驟然操我幣政金愈貴則銀價愈賤錢愈少則銅本愈昂而國法敝矣欲救其敝者悉心體察厥有兩端一在釐定各省鼓鑄銀錢成色樣式一在覈議部庫兌收搭放銀錢章程嘗查英美德法諸國鑄造銀錢概用九成純銀中國現鑄銀錢亦用九成即係仿照各國通行成法音既響亮質亦圓勻其贏餘即以之抵鑪火人工鼓鑄之費是成色本無可議加也惟各省建廠開鑪或先或後所用機器之靈鈍不一胚板之大小不一體質之純雜不一花紋之精粗不一驗收之寬嚴局員之賢否亦不一有核實辦理而適於用者亦有不甚適用者而所鑄之小銀錢重三錢六分一錢四分四釐七分二釐共三種多以八成銀二成銅配合求其精整以適於用更不易得而輔制錢之不足則仍以小銀錢之用為多夫中國自鑄銀錢所以塞漏卮定國法而與外人爭利權也與外人爭利權必自我整齊畫一始我不能整齊畫一是自相爭相軋也自相爭相軋外人遂得乘其隙而操縱之利權不復為我有矣不然以本國商民未有不樂用本國銀錢而反樂用外國銀錢之理其不樂用必以成色式樣不能整齊畫一較諸生銀更多一番轉折而大有不便者在也臣愚以為欲求便民之法當自上而下自內而外其勢始順而易行商民以銀錢完納丁賦稅釐公家悉准折合銀數兌收則商民便矣各省以所納丁賦稅釐批解部庫部庫亦准折合

銀數兌收則各省便矣部庫以所收銀錢折合銀數搭放官兵俸餉則部庫便矣上下交通各省所鑄銀錢自可流通外國所鑄鷹洋亦自可禁絕否則雖聚中國之銀悉鑄成錢而於闢法之敝仍無補也可否請旨飭下戶部覆議鼓鑄銀錢規制頒行各省鑄造字樣以示區別外成色花樣務歸一律不得輕重互異所派承造局員卽責成各督撫臣詳慎遴派厥定功罪信賞必罰以示勸懲而杜弊端其向由部撥定兌收各省折解銀章程每庫平庫色銀一百兩應折收銀錢若干圓一切隨解部假平餘火耗等項應如何照數折收京外搭放官兵俸餉應如何照數折發概須詳細釐定力求簡明庶幾內外相維上下相信民用以便圖法以平而漏卮亦因之而塞矣再就山東一省之銀賤錢荒實視各省爲甚而沿河籌賑防海籌軍處處需用制錢將來德人與華商合辦鐵路礦廠如准其比照奉天山東等處華洋公司章程概用洋式銀錢其爲害於山東者更大不能不預爲抵制臣現因制錢太少已就釐有鑄座集廠銅派員試鑄制錢以資補助而工本太巨擴充甚難仍擬購機置廠鼓鑄銀錢以輔之東省商務一時未能振興銀錢流通恐亦不易自以准民間完納丁賦稅釐爲第一要圖而徵之商民仍須解諸部庫流通之道內外兼權此又臣所籌維而不能不敬瀆宸聰者也下戶部議奏○戊申召奎順來京當差

工程洋員德都司駱博凱爲總教習到堂以來殷勤訓誨啟迪有方時與繕譯人員反覆討論不厭精詳俾學生易於領悟實屬盡心教授懋著勤勞查該學堂教習泰伯福特毛和恩二員經臣奏給寶星有案該總教習於光緒二十一年九月到華現已三年期滿自應照案給獎據辦理該學堂道員錢德培稟請具奏前來合無仰懇 天恩俯准給予德總教習駱博凱二等第三寶星以示優異而昭公賞得 旨如所請行○己酉以溥頤爲禮部左侍郎○是月俄羅斯國新簡駐華使臣格爾思抵任

十一月庚戌朔總理各國事務衙門奏鐵路靈捷可以利國便民原期幹枝相輔脈絡以通多益善然就現時之情形而論有不得不分別緩急次第者請滿鐵之中國鐵路以蘆漢粵漢爲最要之大幹津鎮次之而山海關外奉天營口等處亦爲扼要必爭之地餘皆爲枝路幹路工費鉅而收效遲枝路工費省而收效速 國家轉輸征調呼應靈通所注意者在幹路商賈懋遷貨物欲速見小所注意者在枝路幹路爲本枝路爲末若辦法不分次第勢必使認辦枝路者紛至沓來串通影射而承辦幹路之公司出售股票反至無人過問事多掣肘竣工愈難合本徇末殊屬非計不特此也各公司所辦各路集有股本者甚屬細微其大宗皆係借洋款所立合同皆載有本息未還以前將所辦之路作爲抵押設幹枝雜糅競辦當彼此尚未貫通之際縱有路利必難豐旺華商買取枝路股票亦必寥寥所有應付洋債本息及

鐵路各費恐無實在著落則抵押之路必難收回是權利仍屬他人操縱豈能由我商路之害亦國家之害也臣等悉心體察與其並處重營事以紛歧而易擾不若先急後緩植其大體而徐圖伏查蘆漢粵漢粵幹及甯滬蘇浙浦信廣九等近幹要枝均由總公司盛宣懷承辦津鎮及山海關內外亦奉諭旨資成胡燏棻等辦理太原至棚林已由山西商務局承辦廣西龍州已由提督蘇元春承辦應請旨飭下該大臣等認真督飭先儘此各要路安速辦竣如果收買借款本息及各路各費綽有餘裕再議次第推廣各枝路以昭慎重自此次奏明後除已與各國定有成議及近幹要路地不過百里款不出百萬不在停辦之列外凡華洋各商請辦各枝路此時概不准行如蒙俞允即由臣等通行飭遵待有如所議行○壬子增祺綽哈布奏福建省為瀕海嚴疆口岸林立屯戍空虛前督臣邊寶泉等於本年三月間覆奏裁兵摺內曾經續陳省城尤為要區外距長門海口瞬息可達福寧擬開新口亦可橫通腹地內則人煙稠密商賈輳集教堂基市哥匪游勇出沒靡常雖駐有福字等營練軍摘察彈壓時虞不敷分布滿營駐防現只捷勝營練軍三百名為練習洋操其實沿興壽套所用前膛來復鎗亦皆朽壞不堪練軍如此例操更無論已當茲外患紛乘盜賊多有奴才等熟思審處非嚴整軍旅無以為捍禦之資非改練新操無以收精強之效前將籌辦鎗械情形恭摺具陳聲明俟酌擬章程再行奏請辦理茲查前請軍

務處由黑龍江調取武備學生及所購毛瑟鎗枝已於六月底到閩當由捷勝營挑選六十人仿吳起一人學戰教成十人之意按照德國陸軍操章先教以入手練習諸法既皆嫺熟始將三百人統歸一律教練現在已有規模此後即可次第練習第人數太多單有事無濟於用查滿洲八旗各佐及水師漢軍尙不乏年力精壯之人擬於現練三百名之外無論中兵閒散擇其強壯者再添七百人共練千人成爲兩營之制當茲庫帑支絀不敢藉詞鋪張請加練餉惟既責令常川操練食用衣服之資不能不稍給津貼俾其專心練習統計兩營每月僅需銀二千餘兩尙不及各處練軍一營之費謹將酌擬章程繕單恭呈御覽如蒙 俞允其款爲數無多已通盤籌畫擬由藩庫按月籌給一半餘請在閩海關洋稅藥釐項下作正動支均不難通融挹注再練陸軍原有馬步礮隊之分各審地勢攸宜閩地濱海多山自宜多練步隊而礮隊亦不可缺擬俟續籌有款再行添製克魯卜新式過山快礮十二尊以爲步礮相輔之用得旨著依議行該將軍務當督率將弁認真訓練毋得日久生懈○陶模奏 臣於光緒二十四年八月初二日由驛具奏擬裁督標陝甘兩提標各後營員弁兵丁一摺九月初二日奉到 硃批裁兵一事總宜察酌地方情形可裁則裁不可勉強從事致貽後患此案著再通盤籌畫據實奏明辦理欽此仰見 皇太后 皇上於裁兵節餉之餘仍寓格外慎重之意下懷曷勝欽感伏思綠營官兵額設已數百年平日防

守城堡稽查盜賊護解人犯協拿逃匪是其專責且人皆土著有事時自衛桑梓未必盡屬無用值此庫儲拮据朝廷屢次裁兵節餉臣不敢不再三斟酌前已於謹擬切實辦法詳細覆陳摺內聲請從容辦理在案因遲之又久擬先將督標陝甘兩提標各後營員弁兵丁請旨裁汰今蒙皇太后皇上明見萬里洞察下情著再行察酌地方情形通盤籌畫跪誦之下感激莫名竊維陝甘綠營官兵自同治以來疊遭寇亂屢次裁汰已不及從前額設十分之三而一切差遣巡防事未減少一旦裁除殆盡汛地頓形空虛誠不能無所顧慮該制兵等大率累世充當視兵糧為恆業概令別謀生計必有流離失所者目今民食益艱人心浮動裁之所省無多不如留之尚可收尺寸之用通盤籌畫陝甘兩省原額制兵八萬二千餘名現祇剩二萬四千餘名分營分汛轄境在數千里之遙所支糧餉不及客勇之半即使極力裁減究於餉需無大裨益而回番雜處地方關係甚大再四躊躇所有臣前奏擬裁督標兩提標各後營及各提鎮現存官兵合無仰懇天恩俯念陝甘兩省均處邊要一律免其裁汰臣當咨行各提鎮轉飭各營汛員弁切實整頓期一兵得一兵之用庶不致虛糜餉糈以仰副皇太后皇上慎重邊圉體恤時艱之至意得旨如所請行○依克唐阿奏查本年四月間剿賊李隆非率領馬步賊匪二百餘人由通化樣子哨竄擾海龍縣朝陽鎮焚掠街市衙門並回竄通化六道溝及興京舞鳳樓地方業將

派隊追剿迭次斬擒殆盡並賊首竄入深林各情形先後奏報在案嗣後賊首李隆非在山林內率餘匪往來逃竄均被各隊擊回並擊斃悍目朱雙勝及餘匪十餘名僅留該賊首於六月杪竄至通化楊水橋子地方被圍緊急自知難免託商人作保投誠各營正欲生致其人經營官姜起武等帶營取供其稟請示奴才因其窮感投誠原非得已不殺恐貽後患適據署通化縣知縣何厚琦稟請將該犯留捕餘黨以盜治盜不爲無見當經據情電達總理衙門代奏 旨依克唐阿電悉漏網巨匪李隆非窮感投誠如果留捕餘黨足資得力不妨發其一死儆其心叵測難保必無後患即著依克唐阿提訊後自行酌度情形是否力能銷束無慮其反側無常切實奏明辦理朝廷不爲遙制也欽此旋據營中將李隆非押解到省訪交發審處提訊供認聚集大股搶放火殺人情形不一而足過詢各營均以該賊首狡詐難防無人承保留之致貽後患當經照章先行正法一面飭令各營搜捕餘孽並賊目李廣發劉海川二犯務獲去後嗣據各營稟報李廣發已於受傷後入匿深山存亡未卜劉海川亦已遠颺無蹤餘賊悉數殲滅地面安謐如常等情報明前來伏查劇賊李隆非以百餘人盤踞通化山內時出擄掠屢飭防營並附近屬縣督率民團實力兜剿兩年之久未能殲厥巨魁本年夏因官兵捕急鋌而走險聚集數百人擾及海龍地面旋又回竄通化蔓延日久廣聲勢日張幾致不可收拾而該賊亦因裹脅漸多頗萌異志幸此次調往

親王凱泰莊親王載勛貝勒載澐載瀾貝子奕訢大學士崑岡侍書熙敬敬信敬秀徐郵崇禮松淮都察

院左都御史懷塔布徐樹鉉都統廣忠符珍桂肅親王侍部榮光徐用儀徐曾潛立山陳學榮恩阿克
丹梁仲衡總管內務府大臣世續均著加恩在西苑門馬車並在西苑門內乘坐船隻拖牀○諭安徽按
察使聯元著開缺以三品京堂候補在總理各國事務衙門行走○以聯魁為安徽按察使何福堃為甘
肅按察使○諭刑部尚書趙舒翹著在總理各國事務衙門行走○諭前曹州鎮總兵王連三著交北洋
大臣裕祿遣差委用○諭禮部尚書張蔭桓著在軍機大臣上行走○諭啟秀現在軍機大臣上行走著開
去總管內務府大臣缺○乙卯釋軍機處員已革提督孫萬林已革副都統熙陞阿交榮祿差委○丙辰
調岑春煊為甘肅布政使丁體常為廣東布政使○己未冬至節大祀天於圜丘命訥勒赫恭代行
禮○庚申以江南義紳嚴作霖等籌辦川賑傳旨嘉獎○以景澧為內閣學士○開復已革雲南臨元鎮
總兵姜桂題原官賞還銜翎○辛酉劉樹堂奏滑縣等縣被水成災請截留光緒二十四年漕折銀六萬
兩以資賑撫得旨如所請行○張之洞奏前因湖北漢陽鎗礮廠製造快鎗快礮鎗彈礮架著有成
效援案懇恩准將在各員由核其出力等差照異常勞績保獎本年四月二十二日欽奉硃批
准其酌保數員毋許冒濫以此當經恭錄轉行欽遵辦理茲據總辦湖北鎗礮局署湖北布政使魏廷韶
查明在事人員擇其尤為出力者分別核擬獎敘計請具奏前來查湖北鎗礮廠事體重大工作精微造

成精械分寄各省應用關繫軍實要需非僅湖北一省之事創辦之始一切經營廠工機器選募華洋工匠購備物料教練工徒講求製造全賴在事各員盡心籌畫勞瘁不辭歷時八年之久始克告厥成功實屬始終奮勉異常出力現復建廠設機添造十二生快礮礮工調無煙藥各廠規模更大端緒愈繁尤賴各員殫策盡力經營推廣早著成效查鑄礮廠辦事之員甚多但以所保限於額數經臣查核刪減遵照酌保章程謹擇其尤爲出力者文職十員武職十員照例奏請優獎不敢稍涉冒濫下部議奏○壬戌以爲華爲都察院左副都御史○諭軍機大臣等有人奏據京新鑄銀圓定價過昂一經出城價便跌落皆官錢局設謀漁利等語著依克唐阿體察情形認真整頓原摺片著鈔給閱看將此諭令知之○癸亥江甯將軍豐紳卒賜卹如將軍軍營病故例戰功事蹟交國史館立傳並准建祠予諡○王毓藻奏本年九月間苗匪田中和楊洪漳等滋事二十日攻撲黃平州城及苗團誘擒楊洪漳各大概情形業經電奏在案茲於十月十一日奉 電旨王毓藻電奏已悉清平苗匪田中和等滋事旋率黨竄撲黃平州城業經兵勇擒剿擊退惟匪蹤未報肅清著王毓藻督飭地方文武迅速搜捕務期一律殄除毋留餘孽欽此查都勻府屬清平縣其傍蠻河右屯地向設市場凡趕場之期百貨均集商人例出場規屯紳王思安等收之河左爲苗衆所居總甲田中和楊洪漳等垂涎已久另設新市羣商多去右之左王思安等忿

爭幾至械鬪清平縣劉茂槐前往彈壓示令分期趕場各取市利田中和等悍然不遵糾眾恃強飭差嚴拿膽敢拒捕旋於九月初十日該匪眾三四百人頭纏白布張旗幟鎗礮勢甚洶湧是夜搶掠河右市場縱火燒舖房一空十三四等日竄黃平屬之翁內魚梁營品等處所至燒劫臣當札清丹台凱共四營暨清平等縣團勇分路剿之時該匪煽誘苗民勢將益動升任雲南迤西道鎮遠府全懋績恐蹈咸豐六七年苗亂之轍急起在籍總兵楊昌魁招籌部勁勇二百名帶快鎗七十桿襄糧相助楊昌魁者夙著戰績黔中苗人所素畏服者也二十日夜四更楊逆率黨撲黃平州城文武官激勵兵團竭力巡守搶跋城者數賊當鳴首擲城外天明賊退跟蹤追逐又傷十數賊並斬附楊逆之爲首者蕭明山一名於是田逆由干豆貢楊逆山下坡脚各將二百餘匪均萃於甕谷隴該處四面懸巖著名奇險楊昌魁督兵勇搜剿斃匪不少苗團亦率壯丁攔途截擊蓋向懾於總兵之聲望又因臣告示中有網首要重賞不究餘黨之說誘執楊逆獻之立即於軍中正法懸首於甕谷隴之山巔高處餘匪畏威遂於三四日全數解散現在商旅往返如常塵市無驚惟田中和雍贊而遁聞赴革夷藏匿並聞台拱及八弓各苗處亦有匪類集聚臣仍嚴飭文武官設法弋獲以靖餘孽仰紆宸廑得旨知道了仍著嚴拿逸匪田中和務獲懲辦其台拱等處如有匪類聚集並著上緊搜捕毋留餘孽○趙舒翹奏年奏遵查京師城垣各工分別極重大

重較輕三項於極重中再行分別緩急從明歲起分作四年辦理先儘 皇城次及正陽崇文宣武三門
又次則各段城牆俟修砌完竣後體察庫儲稍裕再將次重各工酌量修葺似此分別緩急戶部或可勉
力支應至 壇廟各處向有歲修工程現在查勘情形尚不甚重應隨時察看如果續有傾圮再行奏
明請 旨此次似無庸併案興工 上諭道舒翹英年奉遵查京師城垣各工分別慎節輕重辦理一摺
著即派道舒翹英年承修將所助應修極重各工分別緩急從明歲起分作四年修葺餘著照所議辦理
單三件併發該部知道○諭本日召見之前四川北鎮總兵何秉璋著交北洋大臣裕祿差遣委用○
甲子諭劉坤一電奏徐海等屬災區工賑浩繁現據頭品頂戴記名道李徵庸遵旨籌墊規銀十萬兩山
津粵電隨上海聽候撥放等語該員從前迭指鉅款此次首先墊款至十萬兩之多徐海地方賑務得資
接濟好義急公深堪嘉尚記名道李徵庸著先行傳旨嘉獎○乙丑諭昨據兩廣總督譚鍾麟奏康有為
本籍抄出逆黨來往信函多件並有即呈覽查閱原信悖逆之詞連篇累牘甚至推譚嗣同為伯里摩之
選謂本朝為不足輔各兩均不用光緒年號但以孔子後幾千幾百幾十年大書特書跡其種種狂悖情
形實為亂臣賊子之尤其信件往還牽涉多人朝廷政存寬大不欲深究株連已將原信悉數焚毀矣前
因康有為首倡邪說互相煽惑不得不明揭其罪以遏亂萌嗣聞無知之徒浮議紛紜有謂該逆僅止意

在變法者試證以抄出函件當知康有爲大謬不道確鑿可據凡屬本朝臣子以及食毛踐土之倫應曉然於大義之所在毋爲該逆邪說所惑以定是非而正人心將此通諭知之○文光奏查前准戶部咨遵議運總督松椿奏銀價日低錢價日昂請令各省制錢每文按八分鼓鑄應如所奏辦理惟分兩既減錢質務須光潔精良倘鑄不如式將委員匠役從嚴懲辦等因當經前兼署督臣恭壽行司遵辦在案竊維鼓鑄之精粗視乎銅質而鑄錢之美惡在乎人工川省鑄錢成法向在甯遠府各廠及貴州地方採買銅鉛產於大壑深山質性本屬乾脆加以採取年久偏老山空精華所餘更形枯薄本不能與江蘇等省採購洋銅相提並論及至鼓鑄之際安置鑄範執鉗以及鑪湯磋磨無不惟人工是賴較之他省以機器壓錢者巧拙勞逸更復迥不相同是以光緒二十年奉文飭令每錢一文鑄至一錢前督臣鹿傳霖以川鑄之錢每文向重一錢二分質色尙難精美擲地即恐破碎若每文僅鑄一錢則內外高低難分字跡模糊莫辨實恐不成錢質奏請仍循舊章故壬午以前卯額仍係照舊辦理嗣奉部駁即將癸未卯額改鑄一錢茲復奉文令鑄八分係爲節省帑項之計敢不勉力遵行已於甲申卯額遵照改鑄惟銅斤雖減而錢數實增工料之需萬難節省查川省每年卯額共用銅鉛一百六十萬斤除折耗外實淨用銅鉛一百四十五萬六千斤以原鑄每文一錢二分計算共應鑄錢一十九萬四千一百三十三串三百三十三文

癸未全卯改鑄一錢共鑄得錢二十三萬二千九百六十串較之原額實多錢三萬八千八百二十六串
六百六十七文除例支工料外實加增工料錢五千二百四十三串四百三十四文又甲申全卯改鑄八
分共鑄得錢二十九萬一千二百串較原額實多鑄錢九萬七千零六十六串六百六十七文除例支工
料外實加增工料錢一萬三千一百零八串五百八十六文伏查例定鑄錢工料向以傾銷數爲衡然
鑄造以成其質磨礱以發其光所用人工實加於傾銷數倍況錢文分兩減輕更非加工細鑄不能使其
精潔川省年來米貴錢荒工資大漲此項多鑄之數俱由造作而成若不於例給工料之外照數加支該
工匠等實難以枵腹從事應請卽於多鑄錢文內按數支給以惠羣工此川省鑄錢並減分兩籲請按照
多鑄錢文加支工料之實在情形也川省銅鉛價值本有一定例章無如出產日微市價日貴且山川險
阻運費尤屬不資例定每銅百斤支價腳銀十二兩除去減平搭票實僅支銀九兩四錢八分川省現買
之銅則須實發銀十一兩四錢五分而甯遠府等承買解省則非一十四兩不能敷用黑鉛每百斤例支
價腳銀四兩三錢七分除去減平搭票實僅支銀三兩三錢七分三釐三毫川省現買黑鉛則須實發銀
六兩三錢六分至招商採買白鉛每百斤例支價腳銀四兩二錢七分三釐二毫七絲川省現買白鉛則
係實發銀六兩三錢六分明知市價例價多寡懸殊非敢故爲增益無如民間行市有定不能抑勒以從

而錢法所關又不敢不竭力籌畫故歷任藩司以及承辦之員無不設法賠補虧欠累繁光緒十九年部議川省每錢一文減重一錢案內准以節省所餘彌縫不敷鉛價是賠累情形部中業已鑒及擬請卽以多鑄之錢易回銀兩留於川省作為彌補銅鉛價值之需此又川省銅鉛例價不足請以多鑄錢文易銀彌補之實在情形也茲據布政使賴鶴年詳請奏咨前來臣維川省鑄錢例支工料銅鉛價值數本不敷故致停欠甚多制錢常形短絀現雖奉文減少分兩而錢文現紅多鑄則工料在所必需且銅鉛市價日昂虧賠更何所底止若不設法籌濟勢必停工且明殊不足以整圓法而利民生該司所請於多鑄錢文開支加增工料并彌補銅鉛不敷價值係屬核實辦法且與部議亦屬相符可否仰懇 天恩俯准照例并咨部立案之處出自 逾格鴻慈下戶部議奏○丙寅子故陝甘總督楊昌濬於浙江省建祠列入祀典○丁卯命英年梁仲衡查勘 東陵 西陵工程○裕祿奏據辦理電報局道員余昌宇詳稱北洋官電自天津至關外連奉省一帶每交夏令山水暴漲桿倒絕斷人力難施電報往往阻斷奏省與京津往來要電須由馬撥數百里至石山站發遞輾轉多有稽遲實緣光緒十八年熱河教匪滋事平定後雖經前北洋大臣李鴻章奏由通州至承德府暨由錦州府至朝陽縣接設兩頭電綫而由承德至朝陽及由朝陽至奉省中間電綫因經費不足未能一律接通此路官綫全局尙覺未臻美備近年報費收數較旺

續有贏餘而宜妥籌接辦擬將承德至朝陽並朝陽至奉省綫路概行接連俾資聯絡一氣將來中國電報有此內地新綫與沿海舊綫兩路分遞既臻迅速而沿海之綫設遇意外阻斷內地之綫亦不至稍有隔闕並可收回海綫公司商報利權核實估計力籌節省查承德至朝陽計程六百里所用電桿可以就地採運其由朝陽至奉省亦計程六百里內有廣寧至新民二百餘里商局原設有電桿可以借桿挂線祇其餘三百餘里電桿預行採買連應用電綫鉤碗機器等項由上海購運統計前項綫路一千二百里計共估需銀三萬九千六百餘兩應請卽在該局積存報費項下動支不另請動別款一切事宜分別派員趕辦來年春間開工秋初計可竣事工竣據實報銷等情詳請奏明立案前來奴才覆查該局所擬接通由承德府至朝陽暨由朝陽至奉省官局電綫係通籌綫路全局於接遞官商電報甚有裨益此項接綫經費祇請在於該局報費項下動支不另請動別款所擬辦法亦尙敷實應請照議辦理下所司知之○諭爲治之道在於務實近因時事艱難朝廷勵精圖治無時不以吏治民生爲念一切臣工條奏凡有關軍國大計者莫不立見施行數月以來所降諭旨亦已多矣內外衙門果能實力奉行何難漸臻上理無如積習相沿牢不可破各直省於奉有事件不過通行曉示假託空言並不見諸實事以致徒煩文牘成效無聞該督撫等身膺重寄受國厚恩當此時艱孔亟豈竟一籌莫展不能稍分宵旰之憂耶茲特再

行申諭所有現在切要之事如練兵辦團保甲積穀以及農工商等務均著懷遵迭次諭旨其已經覆奏者卽行認真舉辦未經覆奏者將籌辦情形於奉到此旨後限一箇月內迅速具奏仍將辦理成效如何隨時奏聞以便派員考查經此次訓諭之後該督撫等務當振刷精神共襄治理勿徇因循之習毋存諛飾之私倘或偏聽劣胥吏仍以通套具文顛覆敷衍希圖塞責則是甘心欺飾自負委任必當治以應得之咎勿謂不戒視成也將此通諭知之○戊辰諭軍機大臣等詞訟爲吏治最要之端疊經諭令各督撫將清訟事宜認真整頓現在各省多有未經奏覆者著卽將現辦章程迅速具奏毋得因循延宕視爲具文○諭軍機大臣等沿江沿海各將軍督撫籌辦漁團現在情形究竟若何著於奉到此次諭旨後查明如已辦有端倪卽行據實覆奏若尙未一律舉辦應尅日籌定章程勒限辦理○諭從來親民之官莫切於州縣欲望其政平訟理移風易俗非久於其任則地方情形民間利病不能周知近見各省往往以實任人員調署別缺甚有缺分稍優不令實缺到任調劑候補輪流接署此等積習州縣居多而道府各缺間亦不免將以一官爲傳舍不肖者惟知迫切取求賢者轉不克從容展布利何以興弊何以革下民又何所適從耶推原其故皆由督撫藩司不能破除情面或因屬吏營求或受他人囑託遂置吏治民生於不問以致候補者蟬聯署事實缺者經歲向隅是豈國家設官牧民之意嗣後各省實缺人員到省後

著卽行飭赴本任不准調劑私人如實缺人員確係不能勝任卽當隨時據實奏參或開缺另補或降等補用均勿稍事姑容其有應行互相對調者亦當爲地擇人不得爲人擇地庶幾吏治澄清日臻上理朕有厚望焉將此通諭知之○己巳派溥良前往山東查看賑務○庚午諭太僕寺少卿裕庚著在總理各國事務衙門行走○辛未諭向來沿海沿江通商省分交涉事務本繁及內地各省亦時有教案應行核辦各直省將軍督撫往往因事隸總理衙門不免意存倖卸總理衙門亦以事難懸斷未便徑行以致往還轉折不無延誤嗣後各直省將軍督撫均著兼總理各國事務衙門大臣仍隨時與總理衙門王大臣和衷商辦以期中外一氣相生遇事悉臻妥洽○連順泰五金之產本天地自有之精華極邊之區尤寶藏之所蓄積疊次奉 諭旨飭令各省籌辦礦務復蒙 簡派礦務大臣於京城設立總局專理其事凡所以盡地利而厚民生者莫不上厪 宵旰勤勞內外臣工均應仰體 聖懷力任艱難伏查庫倫西北至恰克圖一帶毗連俄境土脈豐腴頻年以來內地人民出塞謀食者率以租地墾荒爲名偷挖金沙分運銷售獲利倍徙附近之俄羅斯人亦多越邊潛探近已實繁有徒每滋事端官難查禁而地方遼闊卽嚴予驅逐終屬具文歷經奴才分派委員周勘究竟有金礦若干處如果開採有無弊竇是否可行土法抑須機器成本約需若干飭令詳細查明據實呈覆疊據稟稱蒙古阿什業圖汗車臣汗各旗界內據庫

倫東北六臺地約合三百四十餘里西自鄂爾河哈拉河至額能河共有金礦三處又西北九臺地約合五百三十餘里北自色塔河至伊魯河共有金礦二處周圍約二百餘里金苗甚旺其間以伊魯河所產爲最佳金質實在漠河金廠以上其餘成色或八九分不等惟均產自河內水勢頗深人力掘取所得有限必用西法以機器汲水僱工開挖其利方厚第濱臨沙漠人煙較稀購食招工均須藉資內地若僅採一處徐圖擴充則曠日持久徒糜薪工似宜招集鉅款延聘礦師購運機器相地開採同時舉辦於居中扼要之處設一總廠以資兼顧綜計成本約須銀三百萬兩各該處均隸荒遠匪特無礙蒙旗游牧且係有利無弊確有把握之事並繪具圖說檢取金砂呈送復據三品銜天津稅務司俄人柯樂德利庫西機蒙古金礦各苗中國集款興辦俄人情願附股仍可代爲招集悉遵中國所立章程辦理如用俄人應聽中國官員約束各等情前來奴才覆查泰西各國富強之由大率經營礦務蒙旗產金之處逼近俄疆久爲俄人所覬覦防維杜絕智力俱罷若拒閉太深恐啟攘爭之漸何若豫爲之地猶得操縱自如前次烏里雅蘇臺局境唐努烏梁海各界內俄人造屋挖金盤踞多年反客爲主事經查辦禁絕仍難前鑒匪遙尤當預籌至計者也奴才每於接見蒙古王公詳詢開礦有無窒礙竊維蒙人生齒日繁生計日感近來祇恃洋商販運羊毛駝隻裝載磚茶出境歲獲數百萬金可資挹注始知利之所在端賴人謀果能開拓

利源實與蒙旗有益蒙旗亦必有附股之人奴才參以時勢證以蒙情是蒙古開礦一事既無礙於蒙旗游牧且爲蒙旗興無窮之利似屬難緩之圖惟是資本過重斷非一人之力所能成若僅用土法開挖實慮驟難著效自當招商集股始可收聚斂易舉之功現在中國商情籌款不易然既有此自然之利不應棄之於地徒令兩國無業游民私挖械鬪或釀釁啟端邊庭利害所關良非淺鮮俄人既願附股不若因勢利導轉可就我範圍未始非固全邦交之一助奴才通盤籌畫所有蒙古開什業圖汗車臣汗各旗界內鄂爾河等五處金礦擬請招商集款合力開採由中國自行舉辦有礦之處均近俄界並准附招俄股仍按中國所定章程辦理以免事權旁落倘股款不足應請協撥官款查照礦務向章按年付息礦中所用工匠除礦師及管理機器等可聘用洋人外其餘淘沙工人悉募蒙衆及內地民人不得僱募俄人免妨中國窮民衣食之計但一經開辦誠恐他商見利爭趨未免使礙礦本宜先議定年限所辦各礦概歸該廠經理他人毋得攪奪將來開成之後除去有還股分本息暨各廠一切薪工經費所得礦利應分十成以四成報効 國家解交戶部以一成津貼蒙古王公以五成分歸股東俾得利益均沾惟地隸蒙古邊要事關中外交涉與別省情形不同必須官督商辦應請 旨簡派大員專司督率一切事宜悉歸統轄擇廉幹委員駐廠監查每年將各廠採金寶數收支款目造具清冊呈送查核仍咨報京都礦務總局

稽考以杜弊端而垂久遠如蒙 恩准開採似於邊務大有裨益不僅推闡財源已也合無仰懇 天恩
敕知總理各國事務王大臣覆議具奏俟奉 俞允再行妥擬詳細章程分繪四至界圖奏咨立案一面
招商集股購置機器設廠興辦其烏里雅蘇臺所屬唐努烏梁海各界內金礦如能一律開採俟奴才抵
任後再當察看情形奏明請 旨定奪得 旨著總理各國事務衙門會同礦務大臣妥議具奏○癸酉
以四川候補知府牛琰捐募甘肅傳旨嘉獎○諭御史徐士佳奏要差不宜兼任請變通舊制將軍機總
署大臣改爲額缺一摺我朝自雍正年間設立軍機處凡充軍機大臣之員皆由閣部大臣特簡二百年
來垂爲定制從未聞以兼差本任致形窒礙至於總理各國事務衙門專辦中外交涉事件亦不得不取
材於部院豈不能辦理部務者轉得以交涉擅長耶至謂兼差之所以多多益善由於百物翔貴各大臣
念私計之難是以無或一辭並擬變通舊制優給津貼試思大臣受國厚恩何至竟以身家爲重所奏語
多失體姑念該御史本有言事之責是以不予懲究嗣後言官論事務須切實可行毋得摭拾浮詞徒淆
觀聽○甲戌開復宋慶革職留在處分○欽奉 慈禧端佑康頤昭豫莊誠壽恭欽獻崇熙皇太后懿旨
四川提督宋慶候補侍郎袁世凱均著加恩在西苑門內騎馬並乘坐船隻抱牀○乙亥予故署浙江巡
州鎮本任海門鎮總兵孫昌凱照軍營立功後積勞病故例議卹並附祀浙江省城西湖前兵部尚書彭

玉麟祠○諭御史余誠格奏辦理昭信股票請嚴禁按畝派捐等語據構山東四川兩省本年辦理昭信股票因派捐擾民迭見奏參有案此等弊端他省恐亦不免著各省督撫嚴行禁革嗣後無論何項公事需款捐輸俱不准按畝攤派以紓民力○丙子饒應祺奏吐魯番迪化等縣縣水蝗成災得旨覽奏實堪憫惻卽著督飭該管道府體勘被災情形妥籌賑撫毋任失所○諭內閣學士汪良奏疆臣兼攝總督易滋貽誤一摺前因沿江沿海通商省分交涉日煩內地各省亦皆有教堂教民及鐵路礦務事件往往爭機緊要刻不容緩總理衙門上大臣實有不能遙制之處各該疆臣於所屬地方耳目切近是以明降諭旨令各直省將軍督撫均兼總理各國事務大臣以便遇事及早料理朝廷權衡審慎意在各專責成其有關繫重要必須商明總理衙門方能定議者仍應隨時據實電咨和衷商辦茲據該學士奏稱此局一定無望於裨益之實輒請收回成命於朝廷辦事之苦衷尚未領會至謂辦理交涉存乎其人彼既無因應之方予之以名適滋貽誤持論亦屬過當外吏苟因應無方卽不加以總理各國事務之名亦豈能免貽誤總之總理衙門諸臣與各省疆臣同辦一事要在一氣聯絡相助爲理既無畛域之見自無推諉之私該學士所奏著無庸議○丁丑諭現在朕躬違和所有年內及明年正月應行升殿一切筵宴均著停止明年正月初一日朕親率王公百官恭詣 皇極殿在 皇太后前行禮○色楞額奏奴才承准

軍機大臣字寄光緒二十四年十月十七日奉 上諭現在時局艱難練兵爲當務之急熱河察哈爾均屬邊疆要地所設額兵著該都統認真訓練並督同協佐等員將一應軍實整頓齊備各該旗丁精壯可用者諒必不少亦著逐名挑揀隨同訓練仍將辦理情形隨時具奏將此由四百里諭令知之欽此遵旨寄信前來奴才跪讀之下仰見 皇上整軍經武籌邊弭患之至意當即傳集協領營務各員公同籌議據稱熱河額設弁兵二千二百名又設隊兵一百名歷經前任都統崇禮壽蔭先後奏請由前鋒馬甲內抽練烏鎗步隊五百名馬隊三百名又於餘丁內挑練壯丁二百五十名其餘額兵派充各處堆撥暨經理旗務奏咨書算等事此外圍場尚有舊練馬隊一百名嗣又將原練步隊二百名改爲馬隊一百名奴才覆加查核係屬實在情形伏思熱河地處邊疆內圻京師外控蒙部兼以 圍庭所在尤須加意保衛方足以昭慎重而備不虞奴才到任後校閱駐防各營操演尙有可觀惟本境常川訓練之馬步各兵僅一千五十名統計所屬一府一廳六州縣兩盟十七旗裹延數千里馬賊游勇伏莽未除近又礦務大興處處需兵彈壓實有不敷分布之勢亟應欽遵 聖諭於餘丁內挑選精壯隨同訓練現將餘丁傳集逐名挑揀除已練壯丁二百五十名不計外其精壯可用者復挑選二百五十名擬合前練之壯丁共爲一營一律訓練其稍幼各餘丁仍飭該佐領訓練以備日後陸續選用口外地方山岔紛歧道路寫

達必須多練馬隊庶幾梭巡游擊呼應較靈擬由前鋒馬甲抽練二百名合前練之馬隊三百名共爲二營其額設礮兵一百名向按春秋兩季操演嗣後亦擬常川練習務使演放礮位手眼嫻熟至原有養育兵一百名本屬加恩添設現在率多幼稚其中強壯者亦令及時選練此外未經抽練之額設各兵其派充國庭外國三十九處堆撥獅子國兼喀喇河屯行宮以及熱河各庫各廟等處堆撥暨二十佐旗務奏咨詳算各差書自應分飭該協佐督令於辦公之暇隨時教練務使一兵可得一兵之用奴才竊以治軍之道籌餉爲先欲使其効命疆場必先厚恤其身家在旗兵蒙國家養厚恩原與招募者不同然招募或僅止一身而旗兵則咸有家室現在銀賤物貴兵丁生計尤艱此次擬添練之馬隊壯丁擬請援照緝捕成案每名月給飯食銀二兩八錢原練馬鎗一營亦皆按期操練先前原擬每名月加飯食銀一兩五錢嗣因銀項不敷減爲一兩未免向隅擬請每名每月再酌加銀一兩礮兵一百名改令其常川練習亦擬月給飯食銀一兩以示體恤若遇徵調仍按照十七年出師章程動支行餉至各營應需器械尤爲緊要近年口外馬賊土匪均有無煙鎗快鎗等械兵丁若無利器無從訓練精熟難期制勝容俟奴才咨商北洋大臣飭令軍械所發給新式鎗礮及一切應用之件以期得力如此量爲變通庶兵歸實餉不虛糜倘蒙 俯准則各營該管各官亦擬陸續量爲添派以專責成通計新練各兵每年約需飯

食銀三萬二千八百餘兩合之原設各營每年支銀三萬四千餘兩共需銀六萬七千餘兩查福州船政洋稅各項下每年應撥協餉銀六萬兩自奉撥以來連年僅解其半現在時局艱難練兵誠爲至計部庫既形拮据熱河民貧商瘠實屬無款可籌相應請 旨飭下福州將軍將應解協餉趕緊如數籌撥並將歷年短欠銀九萬五千兩迅籌補解以濟要需其不敷銀七千餘兩爲數無多可否由戶部指撥之處出自 聖裁奴才受任嚴疆責無旁貸自當督率在事各員共矢血誠力求整頓以仰副 聖主慎重邊防之至意一切未盡事宜容俟奉 旨後辦有端倪再行隨時具奏下部議奏○戊寅劉坤一奏江蘇省籌辦昭信股票一案前據地方文武及鹽務河工大小各員認借銀七十餘萬兩兩淮鹽商認借銀一百萬兩業於本年閏三月間恭摺具奏並聲明所有認借銀兩飭令趕緊措辦分期集繳嗣奉 諭旨停止勸辦官民認定之款照案收繳等因又經轉行欽遵並據各屬陸續呈繳各在案惟查各該文武等員或因交卸賠累或因事故出缺力有不逮已慮解不足數具鹽商認借之項迄今呈繳無多疊次飭催繼以部票未頒藉詞觀望此項銀兩先後接准部咨撥抵蘇滬盤金及指撥蘆漢鐵路公司一鉅一孔待用甚殷而京協本省軍餉四國瑞記還款尤關緊要雖經司局遵照部章刊印昭信實收但原議以部票爲憑外省印收本係一時暫用擬請 飭部頒發俾得從速集事以濟要需而免貽誤下戶部知之○諭劉坤一

奏源陳下情籲懇開缺一摺前因兩江重地劉坤一在任有年平素辦事認真惟時局艱難用人一端尤關緊要諭令留心考察不可偏信並當振刷精神力任艱鉅以副期望此正國家禮遇舊臣殷殷垂戒之意該督自應感激知遇益加奮勉方不負大臣共體時艱以身報國之義茲據復奏以兩江政務殷繁本非衰庸所能勝任懇請開缺是以退閒爲卸責之地殊屬非是朝廷待下以誠臣下亦不可有一字之欺劉坤一所請開缺之處著毋庸議仍著懷遵前有將用人行政各事加意講求悉心經理以副疆寄而濟時艱○諭劉坤一奏請將武舉武生挑入學堂酌擬辦法一摺據稱學堂功課如兵法營壘等藝門類既多肄習匪易非文理明暢姿質聰明難期領悟尤非兼習畢業未必能收實效等語武生期於有勇豈能人人盡屬通才該督所請將武舉武生講習文義之處諸多窒礙至咨送兵部考驗酌予出身亦與奏定章程未符著毋庸議卽著懷遵九月十八日所奉 諭旨辦理將未經入伍之武舉武生等就近挑入學堂學習格致輿地及礮隊馬隊工程隊以副實事求是之意另片奏請飭各省綠營馬步箭騰牌雜技一律改習鎗礮等語武備應習鎗礮行陣等法營伍中未可偏廢所請講習鎗礮亦著毋庸議○已卯諭前因各省辦理昭信股票苛派擾民當經降旨除京外各官仍准隨時請領並官民業經認定之款照數收繳其紳商士民人等一概停止勒辦各省前已遵照辦理著各將軍督撫再行詳晰查明除准商及京

外各官原認股票業經集有成數外其餘紳民零星認定之欸如有無力措繳者卽著一律停收以示體恤而杜擾累將此通諭知之